





Early European Books, Copyright © 2009 ProQuest LLC.  
Images reproduced by courtesy of the Royal Library, Copenhagen.  
LN 1413 4° copy 1





Early European Books, Copyright © 2009 ProQuest LLC.  
Images reproduced by courtesy of the Royal Library, Copenhagen.  
LN 1413 4° copy 1



Early European Books, Copyright © 2009 ProQuest LLC.  
Images reproduced by courtesy of the Royal Library, Copenhagen.  
LN 1413 4° copy 1





Early European Books, Copyright © 2009 ProQuest LLC.  
Images reproduced by courtesy of the Royal Library, Copenhagen.  
LN 1413 4° copy 1



Early European Books, Copyright © 2009 ProQuest LLC.  
Images reproduced by courtesy of the Royal Library, Copenhagen.  
LN 1413 4° copy 1

35, - 56.

DA BOX


LN 1413


ex 1

M









DE REGIBVS DANIÆ  
IOHANNIS GEOR-  
gii Sadolini Vibergii Epi-  
grammaton liber vnus, qui Regum  
Danicorum Chorus in-  
scribitur.



AD CALCEM LIBRI ADDITA  
SVNT INSIGNIA REGVM DA-  
niæ, eodem autore, illu-  
strata.



HAFNIÆ,  
Excudebat Laurentius Benedictus.  
Anno 1 5 6 9.  
Cum gratia & Privilegio Re-  
giæ Maiestatis.



55.







2  
SERENISSIMO AC

POTENTISSIMO PRINCIPI DO-

mino Friderico: eius nominis Secundo: Dania, Nor-

uegia, Gotorum, Vandalorumq; Regi: Duci Sle-

suici, Holsatiae, Stormariae, & Ditmariae:

Comiti Oldenburgij & Delmenhor-

stij: Domino suo Clemen-

tissimo:

IOHAN. GEORGIUS SADO-

LINVS VIBERGIVS. S. D.



APIENTISSIMI olim principes  
historicam lectionem magno amore profe-  
quebantur, & eos qui res, à maioribus ge-  
stas, rectè descripserunt, honorabant & ad-  
mirabantur: Nec etiam nunc desistunt viri illustres,  
quos ad Imperij fastigium eminentior Fortuna eue-  
xit, veterum Virtutem, vt in alijs, ita & hac in parte,  
prudenter æmulari. Testantur hoc egregia doctorum  
hominum monumenta: & exempla quoq; præclara no-  
stri temporis, id ipsum non obscure significant: sicut &  
norunt ij qui in scriptis ingeniosorum versantur, ac di-  
uersorum Regum & Imperatorum, principumq; mores  
intuentur. Et meritò quidem in delicijs habentur Hi-  
storiae, & ab omnibus bonis commendantur. Etenim  
ipsæ sapienter contextæ, Virtutum pulcerrima para-

§ 2

dig.

## EPISTOLA

digmata proferunt: legesq; vetustas, ac antiquitatem  
 omnem, complectuntur: & saluberrimas doctrinas de  
 veris, per Iusticiæ metas euntium, præmijs, et de pœnis  
 delirantium commonefactiones, patefaciunt: quidq;  
 pacis pariter & belli tempore sequendum sit, declarant:  
 ac quanta Dei erga Ecclesiam cura enitescat, confiten-  
 tur. Debent igitur Iuniores ea, quæ in officiorum com-  
 memorationem ab eruditis recitantur, diligenter consi-  
 derare, vt artem regendi Rempub: feliciter assequan-  
 tur, scientiamq; rerum bellicarum dextrè adipiscantur.  
 Hoc siquidem pacto fiet, vt regularum cognitione in-  
 structi, exemplorum meditatione confirmati, factorum  
 applicatione excitati, præcellentes euadant ad gloriam  
 Dei, & hominum vtilitatem. Ceterum, non quoslibet  
 historicos amandos arbitramur, sed eos duntaxat, qui  
 memoriam rerum veterum & nouarum, rectè & dilu-  
 cidè, citra mendacia & imposturas, renouare attentâ-  
 runt: quorum ordinem, iuxta seriem temporum, qui vo-  
 let cognoscere, Tabellam Scholasticis Academiae Vite-  
 bergensis à D. CASPARO PEVCERO dedicatâ,  
 ante oculos sibi proponat: nec libellū à D. DAVIDE  
 CHYTRÆO de lectione historiarum rectè instituen-  
 da, compositum, prætermittat. Quia verò non tantum  
 res exterarum gentium tenere, verum etiam patriam  
 Historiam intelligere, valdè prodest ad iudicium ani-  
 mi eruditè formandum, adolescentulos nostros Danos,  
 Dani



# DEDICATORIA.

Danica nationis homo exhortor, ut ea, quæ descripsit  
**SAXO ET DANVS & DANORVM NOBL.**  
**LIS HISTORICVS**, diligenter legant, & ex inge-  
 niosis fabularum inuolucris ueritatē eliciant, ut tanquam  
 obiecta Ægide, prudenter ea retorqueant, quæ à nebu-  
 lonibus obtreñtoribusq; scommata, & mendacia, in  
 Reges & gentem nostram, quasi amentata tela depro-  
 muntur. Cum enim assuefecerint se iuniores ad uerarum  
 Historiarum lectionem, subtiliusq; ac pressius ea repu-  
 tarint, quæ in Danici nominis ignominiam à veterato-  
 ribus refractarijs, subdolè & maliciose, confinguntur,  
 haud ita difficulter quasuis fraudes deprehendent, quæ  
 contra nos, nostrosq; maiores, coaceruantur. Ad lectio-  
 nem autem Saxonis, & ad Regum nostrorum seriem le-  
 gitimam inde ab initio Regni, usq; ad tua, illustrissime  
 Rex, **FRIDERICE II.** tempora, percipiendam; ali-  
 quantulum lucis afferent hæc nostra de **REGIBVS**  
**DANICIS** Epigrammata, quæ eadem tanquam ar-  
 gumenta in rerum Danicarum **LIBROS VIII.** à no-  
 bis compositos, referentur. Nec moror eos, qui insertis  
 Magis quibusdam, & bellorum ductoribus, aut demtis  
 etiam Regib; aliquot, qui à nobis signantur, diuersum  
 catalogum exhibere conabuntur. Illis namq; suæ possunt  
 esse rationes, ad quas respondere non admodum sumus  
 solliciti, cum nobis uetustatis Danicæ notissima mo-  
 numenta ritè suffragentur. Iudicio nempè bonorum Vi-

EPISTOLA

rorū, & me ipsum, & hæc mea scripta, quemadmodum  
et alia quæ à me edita sunt, aut deinceps iuxta ingenioli  
huius modulū proferentur, libenter submitto: alios verò  
amanter oro, vt sapientum censuræ acquiescant, nec te-  
merè labores nostros conuellant, sicut nuper, à nescio  
quo, factum esse comperio, qui cū reliqua in nobis car-  
pere non posset, hoc nomine nos obliquè notabat, quod  
Veterem Orthographiam ab ANGELO POLITI-  
ANO & IOACHIMO CAMERARIO, alijsq. do-  
ctissimis viris obseruatam, studiosius imitaremur. Sed  
quis tales ineptulos responsione dignos iudicabit? Nobis  
profectò satis est, quòd ingenium nostrum à bonis viris  
æstimetur, & ea quæ à nobis fiunt, ab eruditis commen-  
dentur: nam uana certamina aduersus eos, qui, nisi quod  
ipsi faciunt, nihil rectè factum existimant, non suscipi-  
am: nisi fortè, res eò dementiæ deueniret, vt Barbara  
turba Musas elegantiores fædis sordibus offuscare co-  
naretur. Tū siquidem cuilibet bono elaborandū esset,  
vt artium puritas, & disciplinarum integritas, ab in-  
iuria vindicaretur. Enimuerò, nisi literæ emendatæ cu-  
stodiantur, & intemeratæ retineantur, fieri non potest  
vt Regum nomina, & procerū egregiæ Virtutes iusta  
laude exornentur, adolescentesq. satis idonei, ad officia  
Ecclesiæ et Reipub: fideliter præstāda, efficiantur. Quo-  
circa et Regū curam esse sapientes norunt, et doctos de-  
fendere ac ornare, et eos compefcere qui in hominū erudi-  
torum



# DEDICATORIA.

torū casum, atq; in literarum bonarum ruinā, videntur  
conspirare. Cū autem tua, FRIDERICE Rex, in-  
clyta Maiestas imaginibus suis optima ratione respon-  
deat, & laudes maiorum suorum generosa æmulatione  
ita imitetur, vt vetustissimorum Regum honori non  
modò sit comparanda, sed quodammodo etiam præpo-  
nenda, si eo vitæ cursu diligenter perexeris, in quem fe-  
liciter ingressus, miram ingenij dexteritatem, et pecto-  
ris constantiam, tum & voluntatis promptitudinem;  
erga omnes hominū in regno tuo ordines, prudenter de-  
claras: nō abs re euenit, quòd hunc nostrum de REGI-  
BUS libellum, sacratissimo tuæ celsitudinis nomini  
consecremus. Etenim dignitatē Senatoriam sapientissi-  
mè constituisti, cui gubernatorem aulæ tuæ Regiæ fide-  
lissimum, DN. PETRVM OXE, Herum Gi-  
slefeldiæ, præposuisti: Virum sanè vt dignitate hono-  
rum excellentem, ita & rerum tractandarum pruden-  
tia exercitatissimū. Huic adiungitur DN. IOHAN-  
NES FRIIS, Herus Helslagriæ, Regiæ tuæ Maie-  
statis Cancellarius, cuius & sapientiam & fidelitatem  
pater tuus honoranda memoria celebrandus, DIIVS  
CHRISTIANVS III. (de quo extant scripta disera-  
tissima D. Philippi Melanthonis: D. Nicolai Hem-  
mingij: D. Erasmi Læti: D. Iohannis Francisci  
Ripen. & aliorum doctissimorum hominum) lau-  
dare consueuerat. Quibus succedunt alij generosi vi-  
ri,



## EPISTOLA

ri, DN. FRANCISCVS BROCHENHVS,  
 Herus Bramstorpiae, regni Daniae Marefcallus: DN.  
 PETRVS SCHRAM Eq: Auratus, Herus  
 Vropiae: DN. BIRGERVS TROLLE Eq:  
 Auratus, Herus Lilij: DN. OLAVS MVNCK,  
 Herus Tuiziae: DN. GEORGIUS LYCHE Eq:  
 Auratus, Herus Ouergordiae: DN. OLGERS  
 ROSENKRANTZ, Herus de Bollir: DN.  
 PETRVS BILDE, Herus Suanholmiae: DN.  
 ERICVS ROSENKRANTZ, Herus Valesiae:  
 DN. OTTO BRAE, Herus Cnudestorpiae:  
 DN. GEORGIUS ROSENKRANTZ,  
 Herus Rosenholmij: DN. ERICVS RVDT,  
 Herus Fulsangiae: DN. BIORNO KAAS,  
 Herus Starupogordiae: DN. BIORNO AN-  
 DREAS, Herus de Stenholt. Quem praecclarum  
 illustrium virorum numerum, nobilitate natalium,  
 & sapientia animi, tum, & morum dulcedine eximius  
 vir, DN. ABSOLON VRNO, Herus Soe-  
 gordiae, Regni Daniae Cancellarius, tanquam nobi-  
 lissimum aciei bellicae cornu decenter exornat. Quo-  
 rum omnium egregia decreta custodiunt, expediuntq;  
 per suam industriam nobiles, eruditi, & boni Viri  
 DN. IOHANNES SCHOFGORD,  
 Herus Scofgordiae: & DN. NICOLAVS  
 KAAS, Herus Torupiae: Quibus Regia secreta dig-  
 nissime

# DEDICATORIA.

niſſimè ſunt demandata. Horum enim prudentiam  
in dandis conſilijs, & in adminiſtranda Iuſticia, vt alij  
omnes laudant, ita maximè prædicatur ab ERICO  
RVDT Domino Fulſangia, qui honeſtam eorum ſe-  
pè apud me mentionem facere conſuevit. Eorundem eti-  
am Virtus mihi ipſi plurimis experimentis eſt explo-  
rata. In qua ornatiffima nobilium, ſapientumq; Viro-  
rum corona, cauſas diſcuſſurus ipſe, inclyte Rex FRI-  
DERICE, fide & iuſticia præcellens, & Regio  
coruſcus honore, eniteſcis, exemplum æquitatis præbēt  
alijs Reipub: Danicæ gubernatoribus, qui ciuitatibus  
oppidis, inſulis, prouincijs & municipijs, te Rege præ-  
ficiuntur. Quin & militares ordines, vt antè illu-  
ſtriſſimis & ſapientiſſimis HOLSATIÆ DV-  
CIBVS IOHANNI & ADOLPHO,  
Patruis tuis cariſſimis, conſociatus, cū valida manu  
Ditmarios in primæ aciei fronte eniteſcens, ſubigeres,  
inſtructos reddidiſti: ſic etiam nunc pergis iſtud armo-  
rum decus bellicis artibus illuſtrare: quo conatu ſe ſtre-  
nuum præbet nomine Regiæ tuæ Maieſtatis, Vir mag-  
nificus DN. DANIEL RANTZOVIVS,  
& alij viri nobiles & fortes Dani, Germani, Scoti &  
Angli, de quibus in Hiſtorijs noſtris copioſius, Deo  
fauente, diſſeremus. Nec Equeſtres, pedeſtresq; tan-  
tummodo copias inſtruxiſti, ſed maris etiam tutelam  
felicibus auſpicijs ſuſcipiens, nauales pugnas fortiſſimè  
confeci-



## EPISTOLA

confecisti : cuius rei testimonio esse possunt Nauar-  
 chæ clarissimi (Admeraldos Dani appellant) abs te in  
 hostes armati, DN. HERLVFFVS TROL-  
 LE Eq: Auratus, Herus Herlufzholmiy &  
 DN. OTTO RVDT, Herus Moëglecar-  
 diæ, in quorum locum subijt DN. ERICVS  
 RVDT, Herus Fulsangia, Vir vt infracto ani-  
 mo constans, ita & corporis decenti mole admirandus,  
 quem fortissimum Equitum tuorū, Illustrissime Rex,  
 aquiliferam in Ditmarijs habuisti: qui etiam sepe  
 mecum familiariter de virtutibus tuæ Maiestatis col-  
 loqui dignatur: id quod & facit Nobilis vir, DN.  
 ALBERTVS OXE, Herus Nigelsstorpia, præ-  
 ses nostræ Lolandia, & reuerendus Vir, D. M. NI-  
 COLAVS CASPARVS VIBERGIUS, Diæ-  
 cesis Fionica Episcopus vigilantissimus, & alij gene-  
 rosi & eruditi viri, qui mecum conuersantur. Quid,  
 quod & honoris causa, ipse Imperator MAXIMI-  
 LIANVS II. Regesq; alij multi, & Regina, Orato-  
 res & Legatos suos, ad te mittunt? sicut & nunc Gal-  
 lorum nomine DN. CAROLVM DANZÆ-  
 VM apud tuam Maiestatem commorari, mihi Gal-  
 lici milites annunciant. Adeo tuum nomen apud om-  
 nes honoratur. Meretur certè hoc Regia tua Virtus,  
 qua terra, pariter & mari, ita excellis, vt fortitudine,  
 seueritate, grauitate, magnanimitate, beneficentia,  
 liberali.

# DEDICATORIA.

liberalitate & mansuetudine, nullo Regum inferior habearis. Argumento sunt non modo arces, & munitiones ad Barbarorum repressiones per sapientiam tuam edificatae, sicut & FRIDERICH SBVRGVM tuum nunc Regali cultu exstructum, sese nomine & ingenio Regiae tuae Maiestatis attollit: sed, quod palmarium est, Academiae, Scholae, Ecclesiae, quae amplissimis stipendijs exornatae, mitissimum te Regem, & gratiosissimum altorem profitentur. Itaque Theologi, Iurisperiti, Medici, Poetae, Rethores & Philosophi, tum etiam linguarum professores, magnis praemijs abs te inuitati, Iuventutem in Regno tuo recte instituunt: & adolescentes quoque notabili numero, per munificentiam tuam suscepti, in studijs artium, & disciplinarum, sustentantur. Nec pauperes, egeni, viduae & pupilli negliguntur, sed passim tua industria adiuuantur. Iure igitur & armatorum symbola, leones & dracones, & togatorum insignia, agni & olores, maioribus tuis, vetustis Danorum Regibus, olim attributa, nunc etiam Regiae tuae Maiestatis potentiae assignantur: quod publicum testimonium tanto dulcius erit posteritati, quanto Virtute in dies illustrior insurrexeris. Oro aeternum Patrem Domini nostri IESV CHRISTI, ut SANTO SPIRITU suo Regiam tuam Maiestatem, fratresque tuos germanos, Duces optimos, MAGNUM

&




EPISTOLA DEDICATORIA.

& IOHANNEM, tūc & sorores ANNAM  
 illustrissimī Principis Electoris Sax: DN. AVGV.  
 STI coniugem castissimam, & DOROTHEAM,  
 vniuersamq; Regiam vestram prosapiam vnā cum  
 matre carissima DOMINA DOROTHEA,  
 clementer regat: Ecclesiasq; & Respub: in Dania,  
 & in toto Christianorum orbe, aduersus scelera homi-  
 num, & contra furores Diabolorum, tueatur. Benè  
 et feliciter vale, Serenissime Rex: meq; tuæ Maiestatis  
 Clientulum habe commendatum, qui mira benouolentia  
 reliquos tuæ clementiæ ministros prosequi nō dedigna-  
 ris. Ex Torouilla, quæ est in Regia Danorum Insula  
 Lolandia: quam terrā veteres Reges, et tui quoq; ma-  
 iores, Illustrissime Rex FRIDERICE, dignissimis  
 Priuilegijs condecorarunt, sicuti Diplomata in mem-  
 branis descripta, sigillisq; Regijs communita, nec nō se-  
 ricis ac aureis filis honorificè exornata, quæ apud nos  
 conseruātur, euidenter demonstrabunt. Calendis Iulijs:  
 hoc est, die tuo Natali, qui ut felix tuæ Regiæ Maiesta-  
 ti quotannis producat, efficiat Rex immortalis, in-  
 uisibilis, verax, misericors, sapiens, & liberrimus De-  
 us, cui honor & Victoria in secula sempiterna. AN-  
 NO DOMINI. M.D. LXIX.

DE REGIBVS DANIAE  
IOHANNIS GEOR-  
GII SADOLINI VIBERGII EPI-  
grammaton liber vnus qui Regum Danico-  
rum chorus inscribitur.

AD D. FRIDERICVM SECVN-  
dum: Regem Danicum Noruegicum Gothicum Van-  
dalicum: Multarumque circa gentium prin-  
cipem potentissimum:  
Epigramma I.

 Xiguo libro describam nomina Regum,  
Quos nitidos fama Dania culta vehit:  
Gestaq; nostratum breuiter potiora notabo,  
Laudibus vt vigeat gens animosa suis.  
Accipe ferq; leues, Friderice Secunde, camoenas:  
Paruaq; non summi munera Vatis ama.  
Regia, crede mihi, res est ornare Poetas:  
Et Reges, Vatum laus, celebrare probos.

DAN REGNI DANICI CONDI-  
tor à quo Dania nuncupata.  
Epigr. II.

Dan vetus, lapiti senioris germine natus,  
Primus in hac serie Danica sceptrata tulit:  
A Qui



REGES

*Qui sibi Teutonico generosam sanguine Gritam  
Legitimi casto iunxit amore tori.  
Tunc nouies centum, bis mille, decemq; per annos,  
Testibus historys, fulserat orbis honos.  
Vt nitida rigide latentur origine gentes,  
Primaui titulum Dania Regis habet.*

HUMBLVS DANOS FILIVS

Epigr. III.

*Emicuit prestans Humblus virtute paterna:  
Mater naq; potens nobilitate fuit.  
Excidit imperio fraterna fraude petitus,  
Instabilem Diua circumagente rotam.  
Ocia priuatæ non spreuit dulcia vitæ:  
Erubuit viles sed nec adire casas.  
Illius exemplo Fortunam discito ferre,  
Seu sit amans Mater, siue nouerca premens.*

LOTHERVS HUMBLI FRATER

Epigr. IIII.

*Arripuit sceptrum turbato fratre Lotherus:  
Regalesq; ferox accumulauit opes.  
Non contentus erat germanum pellere fratrem:  
Fraternos socios tradidit, ecce, neci.  
Qui semel in tetrum facinus transuersus abiit,  
In viciū pronus quodlibet ille ruit.*

*A pro.*

*Aproprijs merita subuersus cæde ministris,  
Æquum iudicium nunciat esse Dei.*

SCHIOLDVS LOTHERI FIL.

*Epigr. V.*

*Egregius niueo cordis candore Schiöldus  
Nobile virtutis continuauit iter.  
Teutonicum Scatum speciali Marte refregit,  
Vt thalamum peteret, mitis Auilda, tuum:  
Cessit tunc populosa bonis Alemannia Danis,  
Quæ prius à nullo Rege subacta fuit.  
Iura feri iustus damnauit iniqua parentis:  
Crimina maiorum qui fugit, ille sapit.*

GRAMVS SCHIOLDI FIL.

*Epigr. VI.*

*Gramus ab eximio prognatus patre Schiöldo,  
Lucida Mauortis promptus ad arma fuit.  
Sicstrugum, Sueonum Regem, demisit in Orcum,  
Et rigido Goticos perculit ense Duces.  
Ringonem domuit ciuilia bella mouentem:  
Belligeris Finnis acria iura dedit.  
Regna graui demùm Noruegica Marte fatigans,  
Inuersa belli sorte repressus obit.*

A 2

SVIB.



REGES

SVIBDAGERVS NORVAGIVS

gener Grami. Epigram. VII.

Cum Suibdagerus Gramum victricibus armis  
 Pressisset: Victor Danica sceptrum tulit.  
 Filiolam Regis bellamq, probamq, subacti  
 Excepit socio, lege fauente, toro:  
 Quæ pro fratre suo Guthormo vota peregit,  
 Viueret ut Danis principis ille loco:  
 Solueret & fidus victori scripta tributa,  
 Firmataq, daret religionem fidem.

GUTHORMVS GRAMI FIL. AFFL.

nisq, Suibdageri. Epigr. VIII.

Danica quo pacto Guthormus regna tenebat,  
 Maioris Domini subditus Imperio?  
 Sic Fortuna minax voluit: Dea tanta ferenda,  
 Multaq, sunt magnis dissimulanda viris.  
 Noluit hunc populus Regem cognoscere vinum:  
 Post mortem nomen nobile Regis habet.  
 Lior iners viuos merito defraudat honore:  
 Post cineres floret gloria vera tamen.

HADINGVS GUTHORMI FR.

ter. Epigr. IX.

Hellepontiacum Regem superauit Hadingus:  
 Marteque Dunenses cepit & arte viros,

Victor

Victorem patris valido certamine strauit,  
 Sustulit & Regem, Suecia magna, tuum.  
 Contulit Hundingo Gotici moderamina regni,  
 Cuius candorem nouerat atq; fidem:  
 Magnus utrunq; fauor siquidem coniunxerat olim,  
 Qui tandem amborum proditus interitu.

## FROTO HADINGI FIL.

Epigr. X.

Filius ingenuus Froto patre natus Hadingo  
 Vtilis ingenio consilioq; nitet.  
 Vicit Curetas, debellauitq; Ruthenos:  
 Vrbes vastauit, Frisia culta, tuas.  
 Dum premit Anduanum quâ prominet Hellespontus,  
 Engener efficitur qui fuit hostis atrox.  
 Contudit hinc Scotos acres, agilesq; Britannos.  
 In Sueones ducens bella cruenta, cadit.

## HALDANVS FROTONIS FIL.

Epigr. XI.

Solus ut Haldanus regni tractaret habenas  
 Sustulit, heu, fratres fraude doloq; suos.  
 Quid non designat dominandi sæua cupido?  
 Quas non excipiunt pectora dira faces?  
 Ut tamen hæc mittam, cur hic sine cæde Tyrannus  
 Exegit vitæ tempora longa suæ?

A 3

Vera



REGES

*Vera cano: reprobæ veniet sua pœna cateruæ:  
Euenientq̃ bonis præmia digna viris.*

ROA HALDANI FIL.

Epigr. XII.

*Corpore quantumuis paruus, tamen ecce vigebat  
Ingenij magnus nobilitate, Roa.  
Legibus ornavit regnum sanisq̃, bonisq̃:  
Sic meruit patriæ dicier ille pater.  
Vrbem constituit, Danis Roschildia fertur,  
Multorum regum quæ monumenta tenet.  
Hunc Regneriades Hotbrodus marte peremit:  
Succubuitq̃ hosti Dania victa suo.*

HOTBRODVS FROTONISE SORO.

*re nepos, idemq̃ Haldani amitinus.*

Epigram. XIII.

*Nobilis Hotbrodus, Danorum Rege peremto,  
Præsidibus Suecis Danica regna dedit.  
Fraterni vindex fati nitidissimus Helgo,  
Hostibus eripuit munia tanta suis.  
Rex nouus Hotbrodus terraq̃, mariq̃, repressus,  
Præcipiti subijt Tartara cæca gradu.  
Quisquis es, ancipitis cognosce pericula belli:  
Euentus dubios alea Martis habet.*

HEL.



## HELGO ROÆ FRATER HOTBRO.

di verò cognatus. Epigr. XIII.

Cum Sueones rigidos patrijs pulsasset ab oris,

Helgo manu promptus debita sceptrata tulit.

Classe cita Sclauos, speciali lege duelli

Hundingum oppressit robore &amp; arte valens.

Saxonas edomitos Cimbrorum finibus arcens,

Esse sui monuit libera iura throni.

Stuprauit propriam, deceptus pellice, gnatam:

Ob facinus pœnas sponte suapte luit.

## ROLVO HELGONIS FIL.

Epigr. XV.

Deuicit Sueones Roluo, Regemq; peremit:

Hartuaro affini regna subacta dedit.

Proq; suis meritis sibi scripta tributa poposcit:

Sed quæ sperauit, non tulit illa, sibi.

Nanq; vbi vectigal deberent pëndere Sueci,

Horrida compositis arma tulêre dolis.

Rex autem incautus, flamma ferroq; necatur:

Credulitas, eheu, quanta pericla trahit.

## HARTVARS ROLVONIS SO.

rorius. Epigr. XVI.

Regna per insidias Hartuarius Danica Suecus

Arripuit: raptas moxq; reliquit opes.

Quæ

REGES

*Quæ dedit Imperium, lux vitam sustulit illi.  
Eià, quàm pensat singula facta Deus.  
Perculit hunc Viggo niuens Roluonis amicus,  
Per Suecos etiam traditus ipse neci.  
Insurgit rumor, volitant in prælia Dani:  
Nec mora, Suecorum turma cruenta cadit.*

HOTHERVS HOTBRODI FIL.

*idemq; è Sorore pronepos.*

*Epigr. XVII.*

*Montibus ex altis docuit proferre metalla,  
Accumulans magnas diues Hotherus opes.  
Cum lepidis igitur Nymphis in vallibus imis  
Hunc egisse virum fabula prisca refert.  
Vicit Othiniaden Balderum fortibus armis,  
Noruagicosq; fero contudit ense duces.  
Boius Othiniades, Rinda genitrice creatus,  
Sustulit & Regem, victus & occubuit.*

RORICVS HOTHERI FIL.

*Epigr. XVIII*

*Roricus eximio genitore creatus Hothero,  
Horrida Vandalicis intulit arma viris.  
Agmina parcuntur: speciali Marte duorum  
Res agitur: miles Danicus ictus obit.*

*Scla=*



Selaus ut exultans successu sortis amicæ,  
 Projcit in nostros scommiata torta duces:  
 Profiliens Vbbo, Danorum sanguine cretus,  
 Iactatorem auidum sternit, & opprimitur.

**HORVENDILLVS IVTVS RO-**  
 rici gener. Epigr. XIX.

Cimbriaci Imperij tulit Horuendillus habenas,  
 Qui nitidi Martis gloria magna fuit.  
 Collerum domuit Noruegica regna tenentem,  
 Robur & infregit, Sela virago, tuum:  
 Hæc fera Colleri soror, alto dedita Marti,  
 Vera suæ genti Penthesilæa fuit.  
 Roricus hunc generum summo dignatus honore  
 Effecit sponsum, clara Geruta, tuum.

**FENGO HORVENDILLI FRAT-**  
 ter. Epigr. XX.

Eripuit fratri vitam, & cum coniuge regnum,  
 Se statuens triplici crimine Fengo reum.  
 Sic scelus adijciunt sceleri quibus improba mens est:  
 Quis Deus haud curæ, nec pietatis amor.  
 An reprobo fulgens producta est vita Tyranno?  
 Fraudes qui struxit, fraudibus interijt.  
 Ambletus fatuos mores simulare peritus,  
 Ense & igne malum subruit, ecce, virum.

B

AM.

REGES

AMBLETVS HORVENDILLI

Fil. idemq; Rorici ex filia Geruta nepos.

Epigr. XXI.

Sublato patruo princeps Ambletus onauit:

Sceptraq; communi debita voce tulit.

Hic Hermutrudam sibi iunxit lege ingali,

Quæ tenuit digna Scotica regna manu.

Belligeros fudit mira vaser arte Britannos:

Hostilesq; sagax euacuauit opes.

Oppetijt demum patrijs superatus in oris:

O, quam fortunæ fidere nemo potest.

VIGLETVS CIMBRIVS

Epigr. XXII.

Cimbrius eximio splendens Vigletus honore,

Victrici posuit celsa tropæa manus.

Contudit Ambletum bello præclarus & arte:

Is licet & bello clarus, & arte, fuit.

Proruit, en, coniux victi, victoris in vlnas:

Vsq; adeò varia est res muliebris amor.

Vectus ad Imperium traduxit suauiter annos,

Donec adimplèssset tempora longa senex.

VERMVNDVS VIGLETI FIL.

Epigr. XXIII.

Gloria Vermundum decorauit fulgida Regem,

Qui patre Vigleto filius ortus erat.

Huius



*Huius ad aspectum, qui Cimbro pressit Atislus  
 Cum Sueonum grandi terga cohorte dedit.  
 Luminibus cassum faceret cum dura senectus  
 Perstrinxit Regem scommate Saxo graui.  
 Hostilem fastum compescens filius Vffo,  
 Saxonicas fregit, Marte coruscus, opes.*

**VFFO VERMUNDI FIL. COGNO.**  
*mento Olaus Mansuetus. Epigr. XXIII.*

*Corporea retulit sublimem molem gigantem,  
 Vermundo genitus belliger Vffo patre.  
 Pectore visus iners, iuuenis quod pauca locutus  
 Ceperit Harpocratis signa verenda sequi:  
 Quam fuerit sapiens tamen, inlyta gesta docebunt,  
 Et domita illius Saxonis ora manu.  
 Seruauit patriam, leges defendit auitas:  
 Iustus & equus erat, qui taciturnus erat.*

**DAN II. VFFONIS FIL.**  
*Epigr. XXV.*

*Filius Vffonis Dan, huius nominis alter,  
 Edidit auspicio praelia pulcra bono.  
 Sed nitidae tumidus successu fortis, abiit  
 Mancipium Veneris, mancipiumq; gulae.  
 Sic ab honorifica desciscunt stirpe parentum  
 Pignora portentis equiparanda feris.*

REGES

*Tu quicumq; sacra virtutis tendis in arcem,  
Iudicium rectæ fac rationis ames.*

HUGLETUS.

Epigr. XXVI.

*Naumachia undosa præstans Hugletus, adiuit  
Grandia pro patriæ laude pericla sua.  
Contudit Hogrinum, rigidumq; repēsit Hometum,  
Quos genuit Marti Suecia dura graui.  
Cætera quæ gessit, quia Vatum nemo notauit,  
Ecce, tenebrosa nocte sepulta latent.  
Discite, vos proceres, homines non spernere doctos,  
Ingenijs quorum nomina vestra vigent.*

FROTO II. COGNOMENTO VE-  
getus. Epigr. XXVII.

*Corpore robusto præstabat Froto Secundus,  
Vnde etiam Vegetus nomine dictus erat.  
Noruagys pressis, Regemq; Magumq; Frogerum,  
Et bis quinq; simul sustulit ille Duces.  
Deuictis populis præscripsit Danica iura,  
Et bello pacis prætulit vsq; decus.  
Istis temporibus Latij laus Tullius oris,  
Occidit: & natus Naso Poëta fuit.*

DAN



## DAN III. Epigr. XXVIII.

Bissenos numerans vitæ Dan Tertius annos,  
 Suscepit tenera splendida sceptrâ manu.  
 Mente senex, ætate puer, iuuenisq; labore,  
 Consilio, forma, robore, clarus erat.  
 Saxonice procures terræ, populosq; rebelles,  
 Ad flumen domuit, spumifer Albi, tuum:  
 Quodq; sibi petijt ferri gens dura tributum,  
 Hoc rigidis Danis soluere iussa fuit.

FRIDLEUUS COGNOMINATVS  
Celer. Epigr. XXIX.

Auxit & ornauit nostri pomæria regni  
 Fridleuus, gressu, nomine, mente, Celer.  
 Blandus amœna dedit subiectis iura: sed acer  
 Hostibus iniecit dura capistra suis.  
 Subdidit Hollandos, Hibernos atq; Britannos:  
 Mox tamen excussit Danica Brito iuga.  
 Imperium tenuit tunc Cæsar Iulius orbis:  
 Eius at in Danos nil potuere manus.

FROTO III. FRIDLEVI FIL.  
Epigr. XXX.

Vandaliam Froto cepit, vicitq; Ruthenos,  
 Pannonas, ac Hunnos, Britonas, atq; Getas.  
 B iij Hiber.

REGES

*Hibernos, Finnos, Normannos, atq; Suëcos  
Et populos fregit, Lappia vasta, tuos.  
Hic ita longinquis effulsit victor in oris,  
Terroriq; feris hostibus vsq; fuit.  
Pacificus demùm vixit sine Marte cruento:  
Quo genitus Christus tempore, nostra salus.*

HIARNO POETA DANICVS.

*Epigr. XXXI.*

*Frotonis tumulum metris decorauit Hiarno:  
Mercedemq; sibi sceptræ corusca tulit.  
Hæc meruit patrij tantum sermonis abundans:  
Vatibus Aonijs muneris ecquid erit?  
E tenebris raptos satrapas quod viuere cernis,  
Regibus & magnis nomina clara dari:  
Id tribues Musis sapientibus, atq; Poëtis,  
Quorum scripta die lucidiora nitent.*

FRIDLEVS II. FROTONIS III.

*Fil. Epigr. XXXII.*

*Alter Fridlenus, Frotone parente creatus,  
Iura dedit genti, Russia cruda, tuæ:  
Qui de morte patris cum factus certior esset,  
Regna sibi patrio debita iure petit.  
Strauit Hiarnonem veteris de more duelli,  
Cui diadema nitens libera Musa dedit.*

*Terræ*



Terruit insigni bello Noruegica regna :  
 Sequē tibi iunxit, bella Frogerta, virum.

FROTO III. FRIDLEVI II. FIL.  
 cognominatus Largus. Epigr.  
 XXXIII.

Quartus adest Froto, dictus cognomine Largus  
 Quod dederit larga splendida dona manu :  
 Iusticiam coluit virtutis amore : nec unquam  
 Dignis subtraxit præmia digna viris.  
 Huic se subiecit Regi Noruegia victa :  
 Huic etiam palmam Russia quassa dedit.  
 Vicit & Hibernos, & duros Saxonas, armis :  
 Suertingi infido concidit, ecce, dolo.

INGELLVS FROTONIS IIII.  
 Fil. Epigr. XXXIIII.

Dicitur Ingellus stupidus rudisq̃ : sed ipsum  
 Prudentem insinuant splendida facta virum.  
 Nam sua cunctanter quantumvis munia gessit,  
 Perfecit studio non tamen illa malo.  
 Saxonicos satrapas violenta cæde peremit,  
 Quorum fraude pater Froto necatus erat.  
 Starcherus tanta virtutis dicitur autor,  
 Qui monitis acuit regia corda suis.

OLAVS

OLAVS INGELLI FIL.

Epigr. XXXV.

Binis quos genuit natis moriturus Olavus  
 Distribuit totum prouidus Imperium:  
 Alternis vicibus maris hic ut frena gubernans,  
 Naumachia hostiles debilitaret opes:  
 Hic terræ Dominus populis ius diceret æquum,  
 Et ciuile volens aggredieretur opus.  
 Quid reliquam Regis vitam cognoscere tentas?  
 Qui benè delituit, vixit & ille benè.

HARALDVS OLAI FIL.

Epigr. XXXVI.

Piratas domuit truculentos fortis Haraldus,  
 Qui petière fera Danica regna manu.  
 Pugnantes vidit non rarò Balthica Tethis,  
 Et Gothicus Nereus, Oceanusq; pater.  
 Cœruleæ ô quoties hostili sanguine Diuæ  
 Infectæ, tumidis erubuere genis.  
 Fraude mali fratris periit clarissimus heros:  
 Cur premis insidijs, turba profana, bonos?

FROTO V. HARALDI FRATER

Epigr. XXXVII.

Quintus ad Imperium Froto post funera fratris,  
 Consensu populi, nobile vectus erat.

Nec



*Nec virtutis opus coluit, nec Apollinis artes,  
 Delicijs Veneris deditus, atq. gula.  
 Fraude probum fratrem qui sustulit, ille nepotum  
 Versuta captus calliditate ruit.  
 Tàm subito pereunt reprobi plerunq. Tyranni,  
 Iusticiæ qui non munia lata probant.*

*HALDANVS II. HARALDI  
 Fil. cognominatus Biargrammus.  
 Epigr. XXXVIII.*

*Haldanus nulli Regum pietate Secundus,  
 En, patriam iusta cæde piauit humum.  
 Debita sceptrâ tulit, toto plaudente theatro:  
 Dilecto fratri quæ moderanda dabat.  
 Ipsemet interea fera gaudens ducere bella,  
 Concuſsit Suecones liberiore manu.  
 Ebbonem, Hartbenum, Sinaldū, Ecterum, & Aquinū  
 Exitio tristi fortis athleta dedit.*

*HARALDVS II. HALDANI II.  
 frater. Epigr. XXXIX.*

*Egregia præstans virtute Secundus Haraldus,  
 Regalem titulum fratre volente tulit.  
 Hunc Frotoniades victum interfecit Ericus,  
 Fratribus his binis qui patrnelis erat.*

C

Rex

Nec

REGES

*Rex Frotoniaden Haldanus cepit eundem,  
Cuius membra feris dilanianda dedit.  
Victor ita excellens fratri successit Haraldo  
Haldanus coniux, bella Thorilda, tuus.*

VNGVINVS GOTICVS.

Epigr. XL.

*Vnguinus veteri prognatus sanguine Regum,  
Qui Gotici tenuit fulgida regna soli:  
Per testamentum morituri Regis adiuit  
Splendidus imperium, Dania clara, tuum.  
Æmulus hunc pepulit solio Regnaldus ab alto,  
Horrissoni Martis grande secutus opus.  
Discite fortunæ non ulli fidere, Reges:  
Qui didicit Christo fidere, tutus erit.*

SIVALDVVS VNGVINI FIL.

Epigr. XLI.

*Libera Sivaldum decorauit Dania Regem,  
Nec minùs hic gnatæ fulsit honore suæ.  
Illa Sirita suo dignissima nomine splendens,  
Corporis & mentis dotibus alta stetit.  
Quæ cum mille procis, castissima virgo placeret,  
Qui fieret sponsus solus Otarus erat.  
Rex genero fretus Regnaldum perculit hostem,  
Arripuitq; graui Suetica regna manu.*

SIGA.



## SIGARVS SIVALDI FIL.

Epigr. XLII.

Qua potuit Signen gnatam pater arte Sigarus  
 Cinxit, at hanc domuit non minùs acer Amor.  
 Vestibus Hagbertus siquidem muliebribus vsus,  
 Iuit in amplexus, regia virgo, tuos.  
 Deceptor capitur, trabibus suspenditur altis:  
 Infert ipsa sibi mæsta puella necem.  
 Lis oritur: Danis concurrat Suetica turma:  
 Rex ruit oppressus: plurimi vtring cadunt.

## SIVALDVVS II. SIGARI FIL.

Epigr. XLIII.

Rex poterat celebris Sivaldus haberier alter,  
 Funera post patris: noluit ille tamen.  
 Quin potius rigidos hostes pulsare paratus,  
 Elegit pulcra claudere morte diem.  
 Hoc bello accepit non paruum Dania vulnus,  
 Regibus amissis nobilibusq; viris.  
 Inunc, & magni dic vanam Numinis iram:  
 Et iacta cades, crimina, stupra, dolos.

## REGES PLEBEI.

Epigr. XLIIII.

Regibus extinctis procures plebs Dana creauit,  
 Qui regerent oras, Dania mæsta, tuas.

REGES

Roricum & Haterum rectores Iutia sumsit:

Hano Fioniaci ductor in orbe fuit.

Hundingum dominum populosa Selandia fecit:

Ostmarus verò Scanica signa tulit.

Tàm varijs ducibus laceratum nobile Regnum,

Rebus in humanis cuncta caduca monet.

HALDANVS III. BORCARI DANICI

Fil. ex Drotæ, Regnaldi Normannici Regis

filia. Epigr. XLV.

Tertius Haldanus vixit cognomine Fortis:

Forti etenim expedit fortia facta manu.

Vnum atq; vndenos, mediosq; oppressit athletas:

Te meruit forti, bella Iuritha, manu.

Quadrato superans plebeios agmine Reges,

Diuisum arripuit strenuus Imperium:

A quibus ille tamen longo certamine victus,

Commisit gnato bella gerenda suo.

HARALDVS III. HALDANI III.

Fil. ex Iuritha, nepte Sigari Regis.

Epigr. XLVI.

Filius Haldano patri successit Haraldus,

Ingenij summa calliditate vafer.

Principe quo sparsas collegit Dania vires,

Regeq; Noruagica quo viguere manus.

Auspi-



*Auspicio cuius victi iacuerunt Britanni,  
Et Galli, & Scoti, Frisiacique duces.  
Lustra decem coluit pia letæ munia pacis:  
Decrepitus cecidit clara per arma senex.*

**RINGO SVETICKS REX. HA-**  
raldi III. è sorore nepos. Epigr.  
**XLVII.**

*Ne celebris vili caperetur auunculus vna,  
Ringo nepos illi pulcra sepulcra dedit.  
Qui rutilos alta nactus virtute triumphos  
Subiecto posuit clara tropæa solo.  
Tunc auulsa suo nitidissima Scania regno  
Noruagico cesserit, Rege iubente, duci.  
Danorum precibus Ringo commotus amanter,  
Dat reliquas terras, Hetta virago, tibi.*

**HETTA BELLATRIX.**  
Epigr. XLVIII.

*Hetta decens forma, simul & clarissima mente,  
Regibus inuictis annumeranda venit.  
Fæmineis hæc non calathis, non dedita lanæ:  
Non tulit imbelli mollia pensa colo.  
Ad belli fremitus, & ad aspera promptior arma,  
Sustinuit docta prælia dura manu.*

REGES

*Cum fastidirent Dani muliebria regna,  
Reginam coluit Iutia sola probam.*

**OLO NORVEGIÆ REX RINGO-**  
*nis Consobrinus, & idem nepos Haral-*  
*di III. Epigr. XLIX.*

*Olo Gunnonem Rex Grimonemq; Tyrannos  
Prostravit manibus, fortiter ipse, suis.  
Tum pugiles Scatum, validumq; necavit Hiallum:  
Amplexusq; tulit, nobilis Esa, tuos.  
Hinc decies septem claro certamine Reges  
Delevit, pelagi per loca vasta means.  
Starcheri perijt vesana fraude petitus:  
Improba sic multos fallit amicitia.*

**OMUNDVS OLONIS FIL.**  
*Epigr. L.*

*Floridus Omundus Noruegica regna subegit:  
Et fregit vires, Rusla virago, tuas.  
Inq; Henetos Reges se tollens fortibus armis,  
Concussit belli fulmine Vandaliā.  
Tum placidam vitam firmata pace peregit:  
Dulcibus & Musis ocia grata dedit.  
Principis est, Virtus non tam fera praelia Martis,  
Quam nitida blandum pacis amare decus.*

SIVAR



## SIVARDVS OMVNDI FIL.

Epigr. LI.

*Nec valuit fausto Siuardus marte, nec arte,*

*Sed fortuna viro nec satis æqua fuit :*

*Quare quæ studij cepto conamine gessit,*

*Hæc ea successum cuncta tulere malum.*

*Pulsus enim Suecis amisit Scanica fulcra :*

*Inferior, Sclauis Cimbrica frena dedit.*

*Indè graui Scanum deleuit strage Simonem,*

*Qua tamen in pugna decidit ille simul.*

## BUTLVS SIVARDI FRATER.

Epigr. LII.

*Post fratrem obtinuit Butlus lacrymabile regnum,*

*Subiectis Gotico, Vandalicoq; iugo.*

*Sed rigidis quid non hic hostibus intulit arma,*

*Nomina qui voluit Regis habere boni ?*

*Illi, vaticinor, non defuit alta voluntas :*

*Defuit incerto quæ sedet orbe dea.*

*Maxima summorum res est prudentia Regum :*

*Fors tamen hanc dubio sub pede cauta premit.*

## IARMERICVS SIVARDI FIL.

Epigr. LIII.

*Non minimo fulsit Rex Iarmericus honore :*

*Vicit enim Sueones, Sclauonicosq; duces.*

*Liunoni.*

REGES

*Liuronides Bizzo, delator perfidus, illum  
In cædem armauit, casta Suauilda, tuam.  
Vnde per affines pugna deletus acerba,  
Præmia tam stolidæ credulitatis habet.  
Quot claros homines insana calumnia fœdat:  
Quàm vicina bonis Regibus ista lues.*

BRODERVS IARMERICI  
Fil. Epigr. LIIII.

*Post patris exitium tulit aurea sceptrâ Broderus,  
Aptus ad arma parum, Mars truculente, tua:  
Aptior, inquirens rapidarum lustra ferarum,  
Extitit ad studium, Delia diua, tuum.  
Pacis amans niuæ populum sine crimine rexit:  
Felix qui potuit munia tanta sequi.  
Pace vigent leges, florescunt pace Camæna,  
Pace nitent Vrbes, pace coluntur agri.*

SIVALDVS III.  
Epigr. LV.

*Tertius acceptis regni Sinaldus habenis,  
Aspexit gnati fortia facta sui:  
Vtpotè qui veterem patriæ renouauit honorem,  
Suscipiens tumido classica bella freto.  
Qui quoq; præstantes pugiles transmisit in Orcum  
Te turpi eripiens, Scania facta, iugo.*

*Hæc*



*Hæc genitor gnati templatus fulgida gesta:  
Sneio, decens hæres tu mihi, dixit, eris.*

SNEIO SIVALDI III. FIL.

Epigr. LVI.

*Sneio Gotos Danis subiecit iure duelli:  
Multaq; cum Suecis prælia sustinuit.  
Auspice pugnaces hoc Intia Cimbrica turmas  
Umbricios, Herulos, Vinniliosq; dedit:  
Qui populis iuncti, genuit quos nobilis Albis,  
Ceperunt sedes dura per arma novas.  
Hinc Lombardiaci regni manavit origo,  
Culta vetustatis ceu monumenta docent.*

BIORNO.

Epigr. LVII.

*Cur sedet obscurus dic, auree Phæbe, Biorno:  
Cum tulerit celsa fulgida sceptrâ manu?  
Sic ego: sic contrâ citharæ pulsatur Apollo,  
Qui nitidus Vatum dicitur esse pater.  
Quos lepidæ nullo dignantur honore Camænæ,  
Hos nullæ laudes, gloria nulla manet:  
At quibus Aoniæ donant sua munera Diuæ,  
Nomen habent clarum, perpetuumq; decus.*

D HARAL.

Hæc

REGES

HARALDVS IIII.

Epigr. LVIII.

*Quartus adest solo titulo descriptus Haraldus:*

*Nec nitet hic facti nobilitate sui.*

*Magnanimi Reges, homines adamate peritos,*

*Inclita qui vestri temporis acta notent.*

*Historicis nam quid melius, doctisq; Poëtis,*

*Qui decorant scriptis Regia gesta suis?*

*Mœnia rumpuntur, pereunt ætate metalla:*

*Historiæ, nec non carmina, morte carent.*

GORMO HARALDI IIII.

Fil. Epigr. LIX.

*Abdita naturæ quærens spectacula Gormo,*

*Sustinuit longæ tædia lenta viæ.*

*Vidit Hyperborei mundi miracula dira,*

*Infernasq; domos, Tartareosq; duces.*

*Multaq; cognouit tenebrarum vectus in orbem,*

*Temporibus nostris non habitura fidem.*

*Gentibus è Danis tunc primus dogmata Christi*

*Torchillus cepta, fertur amasse, fide.*

GOTRICVS GORMONIS

Fil. Epigr. LX.

*Gotricus antiqua prognatus origine Regum,*

*Pace fuit clarus, militiaq; nitens.*

Saxo.



Saxoniam domuit conflictu, lege, tributo:  
 Suecorumq; armis contudit arma suis.  
 Illius & vires sensisti, Carole Magne:  
 Et tu magnificis, Frisia clara, viris.  
 Tempore cum longo regni tenuisset habenas,  
 Decidit insidijs militis ipse sui.

OLAVS II. GOTRICI FIL. OLGE.  
 rus appellatus. Epigr. LXI.

Patria regna graui bello lacerauit Olaus,  
 Subiecitq; iræ publicæ iura suæ.  
 Doctiloquis Gallis Olgerus dicitur idem:  
 De quo tu, lector, Gallica scripta leges.  
 Gallorum siquidem socialia castra secutus,  
 Præsidium fecit, Carole Magne, tibi:  
 Vnde Saraceni dare terga probrosa coacti,  
 Quæ rigat Hesperios Bætis Iberus agros.

HEMMINGVS OLAI II.  
 Fil. Epigr. LXII.

Vt niuea populos Hemmingus pace teneret,  
 Duceret & vitæ tempora læta suæ:  
 Fœdera iusta Pio cum Cæsare fecit, & ipsum  
 Quàm sibi, tam regno, iunxit amore pari.  
 Principis est Virtus non tantum Martia bella,  
 Verum etiam niueum pacis amare decus.

D 2

Grata

REGES

*Grata Deo pax est, pax est quoq; grata Camænis:  
Lex, Pietas, Musæ, Martē furente, iacent.*

RINGO II. GOTRICI EX FILIA

*nepos. Idemq; Hemmingi amitinus.*

*Epigr. LXIII.*

*Cimbrica constituit Ringonem Iulia Regem,*

*Quā nitet Vmbrio celsa Viberga solo.*

*Eiusdem imperium speciosa Selandia spreuit,*

*Vtpotē Siuardi mota favore ducis.*

*Gotricus hos habuit gnatarum stirpe nepotes:*

*Daniadum Regum Gotricus altus honor.*

*Totius vt regni raperet sibi Ringo coronam,*

*In consobrinum protulit arma suum.*

SIVARDVS II. COGNOMENTO

*Ringo, Ringonis II. consobrinus.*

*Epigr. LXIII.*

*Vandaliam pressit Siuardus vindice dextra,*

*Qui tuus enituit, Gotrice prisce, nepos:*

*Quem consobrinus cū Ringo vocasset in arma,*

*Excelsi socius qui fuit Imperij:*

*Disiecti rapido ciuilem fulmine belli,*

*Ad manes tetrū corripuere gradum.*

*Iungere quos renuunt Regum speciosa theatra,*

*Illos non renuit iungere furua domus.*

REG.



## REGNERVS SIVARDI II.

Fil. Epigr. LXV.

*Marte feros Sueones Regnerus triuit acerbo:**Noragicum sceptrum clara per arma tulit.**Ciuiles fremitus domito compescuit hoste:**Cesaris infregit bellipotentis opes.**Saxoniam cepit: Gallorum depulit arma:**Inuasit Scotos, Britonas, atq; Petos.**Orcadas arripuit: terras Athamantidos Helles**Terruit: Hiberno principe captus, obit.*

## IVARVS REGNERI FIL.

Epigr. LXVI.

*Tam virtute potens, quam sanguine celsus, Iuarus**Horrisoni Martis grande peregit opus.**Britonas, Hibernosq; petens victoricibus armis**Eripuit vitam, belliger Hella, tibi.**Sic patrij fati vindex clarissimus iuit,**Hostilesq; ferox attenuauit opes.**Anglica regna suo prudens moderamine rexit:**Germano fratri Danica sceptrum dedit.*

## SIVARDVS III. IVARI FRA.

ter. Epigr. LXVII.

*Igneus ingenio Siuardus, & arte refulgens,**Daniacum regnum, fratre volente, tulit.*

REGES

*Pugnantem vidit Ligeris, rapidusq; Garumna,  
Danubiusq; potens, Eridanusq; celer.  
Nauigio celebri violentos contudit hostes,  
Qua Slesuicanam Nereus ambit humum.  
Pacifica demum transfuso tempore vita,  
Pieris Nymphis ocia grata dedit.*

ERICVS SIVARDI III. CON.  
sanguineus. Epigr. LXVIII.

*Stemmata Siuardi Regis generosus, Ericus  
In consanguineos sustulit arma suos:  
Quo penitus bello consumtus regna reliquit,  
Quae tulit insanæ seditionis amans.  
Numina sic rigidos conculcant celsa Tyrannos:  
Quiq; bonos ledunt, hos quoq; pœna manet  
Talibus exemplis homines traherentur iniqui:  
Sed ruis in vetitum, turba profana, nefas.*

ERICVS II. SIVARDI III.  
Fil. Epigr. LXIX.

*Rex fit honorificus Siuardi gnatus Ericus,  
A primo dum vix ubere tractus adest.  
Hostis habebatur Christi iuuenilibus annis:  
Maturus, coluit iussa verenda Dei.  
Nec coluit tantum, sed & omnes ritè doceri  
Mandauit summi de bonitate Patris:*

Tem.



*Tempore quo nostris, diuinus præsul, in oris  
Protulit. Anscarius dogmata sana Dei.*

## CANVTVS ERICI II. FIL.

*Epigr. LXX.*

*Aurea Danorum gestauit sceptræ Canutus,  
Mirifica præstans qui probitate fuit.  
Huic Ennignupus præclaras tradidit artes,  
Sustinuitq̃ humeris pondera vasta suis.  
Rex, Regnumq̃, boni viguêrunt voce magistri,  
Audyt & doctum plebs animosa senem.  
Tunc in honore fuit Virtus, tunc inçlyta Musa  
Aureolis nituit conspicienda comis.*

## FROTO VI. CANVTI FIL.

*Epigr. LXXI.*

*Marte potens Froto, sed pace potentior alma,  
Inter honoratos fert diadema viros.  
Fonte sacro tinçtum veneranda Britannia vidit,  
Dogmate quæ Christi clara, decensq̃, stetit.  
Hic populis scripsit subiectis candida iura:  
Et Christi inssit sancta statuta coli.  
Condere quippè bonas leges, est pectoris æqui:  
Diuini reputa cordis, amare Deum.*

GOR.

REGES

GORMO II. FROTONIS VI.

Fil. cognominatus Anglicus.

Epigr. LXXII.

Gormonem spreuit populoſa Britannia Regem,  
Dania quem digno mitis honore tulit.

Anglicus hic prima celebratus origine fulſit:

Cognomen patrio ſuſtulit ille ſolo.

Cur non Imperium tenuit præclarus utruſq.?

Sic voluit dubia quæ Dea nixa rota eſt:

Adde, quòd eſt durum ſtudium mortalibus ipsis,

Prouida Fatorum nòlle ſtatuta ſequi.

HARALDVS V. GORMONIS II.

Fil. Epigr. LXXIII.

Cultor opum, verus cui deſuit vſus, Haraldus

Extitit, & fædæ ſeruus auariciæ:

Quare nec nitidam famam, nec nobile nomen

Inter honorificos obtinet ipſe viros.

Sint igitur procereſ largi, ſint deniq. mites,

Et tribuant dignis præmia digna viris.

Larga manus decorat Reges, & prompta voluntas:

Seruileſ animoſ ſordida cura probat.

GORMO



## GORMO III. HARALDI V.

Fil. Epigr. LXXIII.

*Saluifici Gormo contempsit nomina Christi:**Duraq; Christicolis intulit arma pjs.**Progeniuit binos huic Thira Britannica gnatos,**Per quos Sclauorum est debilitata manus:**A quibus & pugna tentata est Anglica tellus,**Ac Hibernorum castra reuulsa ducum.**Cum senior natus rutilus esset ab hoste Canutus,**Decrepitus proprio se pater ense ferit.*

## HARALDVS VI. GORMONIS III.

Fil. Epigr. LXXV.

*Classica bella ferox pelago confecit Haraldus,**Quassauitq; armis extera regna suis.**Vandalicam gentem superauit, cepit & urbem**Cui nomen Victor Iulius ante dedit.**Induperatorem Vindex inuasit Othonem**Cimbrica quod valida presserat arua manu.**Fulgidus hic princeps gnati ambitione fugatur:**Exulem ab insidijs missa sagitta necat.*

## SVENO HARALDI VI. FIL.

Epigr. LXXVI.

*Qui pepulit regno dilectum Sueno parentem,**Quæ sibi commeruit præmia digna tulit.*

E

Vanda.

REGES

*Vandalica vinclis ter strictus gente iacebat:  
Fortiter à Sueonum Rege repressus erat.  
Post miseros casus tandem sua crimina fassus,  
En, sibi placatum sentijt esse Deum.  
Tùm demùm Victor Noruegica regna subegit,  
Et votis habuit consona fata suis.*

CANVTVS II. COGNOMENTO MA-  
gnus, Suenonis Fil. Epigr. LXXVII.

*Magnifica fulsit belli Virtute Canutus,  
Cui cognomentum nobile Magnus erat.  
Sclauos & Sembos vicit, cultosq; Britannos:  
Noruagicos domuit, Marte fauente, duces:  
Tùm quoq; Normannos petijt victricibus armis  
Sequana quàm gelidus Francica rura secat.  
Morborum hic valido tandem cummulatus aceruo,  
Sed Martis studio vix satiatus, obit.*

CANVTVS III. COGNOMENTO  
Durus Canuti II. Fil. Epigr.  
LXXVIII.

*Indolis egregiæ decoratus honore Canutus,  
Ordine perspicuo dinumerandus adest.  
Extera Regna, pater præstans quæ rexerat antè,  
Hac valuit nullo iure tenere sibi.*

*Vsq;*



*Vsq; adeò cunctis non est fortuna fidelis:*

*Quæ rapit huic, alij promere dona solet.*

*Ergò vagæ Dominae ludibria ferre decenter,*

*Principis excellens est sapientis opus.*

# MAGNVS COGNOMENTO BONVS

*Sancti Olai Noruegiæ Regis Fil.*

*Epigr. LXXIX.*

*Classibus æquoreis Magnus freta cœrula findens,*

*Suenonem docuit vertere terga ducem.*

*Terrestri ductu varians catus agmen, eundem*

*Danorum tota Victor abegit humo.*

*Cimbriaca Sclauos pepulit tellure procaces,*

*Et dedit illorum millia multa neci.*

*Omne non dextro, lepore occursante, periuit,*

*Cornipidis lapsu præcipitatus equi.*

# SVENO II. AMITINVS CANV.

*ti III. Epigr. LXXX.*

*Stemmata sublimi prognatus Sueno Secundus.*

*Post Magni interitum splendida sceptrâ tulit.*

*Euentu tristi petijt Noruegica Regna:*

*Victus enim turpi se dedit ecce fugæ.*

*Templa Dei iratus maculauit cæde cruenta,*

*Præsule cum precibus tura ferente sacris.*

E 2

Dogmas

REGES

*Dogmate mox monitus recto, sua crimina luxit:  
Præstitit & summo pectora fida Deo.*

**HARALDVS VII. SVENONIS II.**  
*Fil. Epigr. LXXXI.*

*Septimus Imperium patriæ suscepit Haraldus,  
Hoc licet imperio non satis aptus erat.  
Vt procerum & vulgi sibi conciliaret amorem,  
Censura tetigit crimina nulla graui.  
Hinc variæ cædes ortæ, variæq; rapinæ:  
Hinc via vesanis strata libidinibus.  
Delirant omnes nisi rectâ lege regantur:  
Lege Deus colitur, lege iuuatur homo.*

**CANVTVS IIII. APPELLATVS**  
*Sanctus frater Haraldus VII. Epigr.  
LXXXII.*

*Ecce Canutus adest hoc dictus nomine Quartus:  
Quem niuæ tenuit relligionis amor.  
Estonas & Sembos, Curetasq; ipse subegit:  
Subiectisq; viris æqua statuta dedit.  
Non modò bella sequi, sed & almas dicere leges,  
Crede mihi, res est principe digna viro.  
Optimus hic patriæ pater à Blaccone petitus,  
Christus vt à Iuda, proditione perit.*

OLAVS



OLAVS III. CANVTI III.  
frater. Epigr. LXXXIII.

Cum nitido solio princeps fulgeret Olavus,  
Horribilis pressit Danica regna fames.  
Non pluuias cælum, non gramina terra reclusit:  
Monstrauere ferum cuncta Elementa Deum.  
Effusis precibus pœnam Rex transtulit in se  
Diuinam, patriæ captus amore suæ.  
Rex moritur subito, simul ac bona tempora dantur:  
I nunc, & Votis pondus adesse nega.

ERICVS III. OLAI III. FRATER  
cognomento Bonus. Epigr. LXXXIII.

Corpore robustus, linguaq; disertus, Ericus:  
Illicitæ Veneris sed studiosus erat.  
In procures Henetos victricia sustulit arma  
Terribilisq; solo, terribilisq; salo.  
Nomine dum Voti Solimorum tendit in urbem,  
Febribus insanis exanimatus obit.  
Interea regnum patrium turbauit Haraldus  
Filius, indignus sumere sceptrum sibi.

NICOLAVS ERICI III. FRATER.  
Epigr. LXXXV.

Nicolas Sclanos vicit virtute Canuti,  
Qui dux militiæ prouidus usq; fuit:

REGES

*Proditione tamen cecidit dux ille Canutus*

*Per gnatum Regis traditus exitio.*

*Ad scelus infandum Rex conuiebat ineptus :*

*Signabat iusto lumine cuncta Deus.*

*Pœna manet fontes : Regem, gnatumq; peremit*

*Interitu iusti Dania mota viri.*

*HARALDVS VIII. ERICI III. FIL. IDEM.*

*quæ Diui Canuti à Magno Nicolai Regis filio*

*interfecti frater. Epigr. LXXXVI*

*Iutia regali titulo decorauit Haraldum,*

*Hoc splendore licet non benè dignus erat.*

*Nempè latrocinys famosus prædo cruentis,*

*Tentaui varijs crimina dira dolis.*

*Cæde iacet sæua fratre interfectus Erico :*

*Cumq; parente suo pignora cæsa iacent.*

*Veste tamen sumta muliebri cautus Olaus,*

*Euasit patrui noxia tela sui.*

*ERICVS III. HARALDI VIII.*

*frater. Epigr. LXXXVII.*

*Conseruit validam pugnam terraq; mariq;*

*Vnde decus magnum Quartus Ericus habet.*

*Quod consanguineos rigidis deleuerit armis,*

*Imperij id fecit ductus amore sui.*

*Mar.*



*Martia Sclauonica confregit robora gentis:  
 Tumq; tuas rigidus Rugia carpsit opes.  
 Post varios belli motus, variosq; labores,  
 Nescio qua vulgi seditione perit.*

ERICVS V. ERICI IIII. EX SO.  
 rore nepos. Epigr. LXXXVIII.

*Quintus Haraldiadem delenuit Ericus Olaum  
 Scanica tentantem motibus arua feris.*

*Felici gessit qui Marte domestica bella,  
 Hostibus externis terga pudenda dedit.*

*Vicinus tumulo regni dimisit habenas,  
 Seq; cuculligeris coetibus inseruit.*

*Sumsit pro gladio, sphaera, diademate, sceptro,  
 Tegmina rasorum prodigiosa patrum.*

CANVTVS V. NICOLAI REGIS  
 ex Filio Magno nepos. Epigr. LXXXIX.

*Quinte Canute, tibi fulget quoq; nobile nomen,  
 Vita licet fuerit non diuturna tua.*

*Vtilis ipse quidem belliq; domiq; fuisti:  
 Sed fortuna tibi non satis æqua fuit.*

*Suenoni iunctus versuto munera Bacchi  
 Dùm libas, dira fraude necatus obis.*

*Qui socijs sese credit bibulisq; malisq;  
 Credere se toruis dicitur ille lupis.*

SVE.

REGES I

SVENO III. ERICI IIII. FIL.

Epigr. XC.

*Mœnia Cimbriacæ firmauit Sueno Vibergæ,  
Iutorum Vmbricia quæ regione nitet.  
Hæc sita monte sacro demonstrat nominis ortum:  
Diuinum montem quippè Viberga notat.  
Vrbs ea cùm turres & propugnacla tulisset,  
Litterula versa dicta Viburga fuit.  
Hæc est, si nescis, Sadolino patria Vati:  
Quam nunc metropolim Iutia tota colit.*

VALDMARVS ERICI III. EX

Dino Canuto Filio nepos.

Epigr. XCI.

*Valdmarus nitido Suenonem Marte subegit,  
Cuius sublatus fraude Canutus erat.  
Illius ante pedes iacuit Finlandia victa:  
Exhibuitq; illi Rugia pressa manus.  
Oppida Vandalicæ concussit plurima gentis:  
Teutoniæ varijs intulit arma locis.  
Nec celebris tantùm bello, sed pace beatus  
Ornavit studijs Danica rægna pijs.*

CANV.



## CANVTVS VI. VALDMARI

Fil. Epigr. XCII.

Sextus & ingenio præclarus & arte Canutus,  
 Eximio summis par stat honore viris.  
 Magnanimus torui contempsit Cesaris iram,  
 A Danis voluit qui sua iura coli.  
 Sclauorum rabiem ferro, flammaq̃, refregit:  
 Refregitq̃ tuas, Rugia dura, manus.  
 Hinc in Germanos cataphractum transtulit agmen,  
 Quos rapida Viadrus claudit & Albis aqua.

## VALDMARVS II. CANVTI VI.

frater. Epigr. XCIII.

Valdmarus domuit Finnos, & Liouonas acres:  
 Teutonicis fecit prælia multa plagis.  
 Hamburgum cepit, Romanaq̃ depulit arma:  
 Ditmarico posuit Martia castra solo.  
 Extractus regno Suarini fraude dolosi,  
 Pro reditu saluo munera magna dedit.  
 Deditus hinc Recti studijs, Paci q̃ dicatus,  
 Conscripsit certis Danica Iura libris.

## VALDMARVS III. VALDMARI

II. Fil. Epigr. XCIIII.

Valdmarus iuuenis Valdmaro patre creatus,  
 Daniacis mistus Regibus, ecce, nitet.

F

Impe

REGES

*Imperij consors patrij tulit ipse coronam,  
Hic ubi Sluesuici splendida templa patent.  
Duxit Iberorum Regum de stirpe puellam  
Quæ Leonora suo nomine dicta fuit.  
Sed nouus hic princeps, hæc & Regina nouella,  
Ante diem fati occubuere suis.*

ERICVS VI. VALDMARI III.  
frater. Epigr. XCV.

*Imperij culmen conscendit Sextus Ericus :  
Sed regni infausto sidere rexit opes.  
Quippè dolo fratris deceptus, colla securi  
Post varias clades percutienda dedit.  
Truncatum corpus tenebrosis mergitur undis,  
Quà Slesuicana Sleia rotatur humo :  
Hinc demùm extractum meruit regale sepulcrum :  
Conscia fraterni stant monumenta doli.*

ABEL ERICI VI. FRATER.  
Epigr. XCVI.

*Horridus oppressor fratris, reprobusq; Tyrannus,  
Dulce quid humani nomen Abelis habet.  
Improbis hic certè non longo tempore fulsit :  
Frisiaco siquidem corruit ille solo.*

*Hic*



*Hic hominum insanæ turbæ solet exitus esse,  
 Subijciunt pedibus qui sacra iura suis.  
 Qui sapit, imperij non ambitione tenetur:  
 Quin potius Spartam curat, amatq, suam.*

**CHRISTOPHORVS ABELIS**  
*frater. Epigr. XCVII.*

*Christophorus nitido diademate tempora cinctus,  
 Et clarus niuea simplicitate fuit.  
 Hic, quia mitis erat scelerataq, segnis ad arma,  
 Multa tulit Regi non toleranda viro.  
 Bella etiam tentans, velut omina cæca ferebant,  
 Sentyt in regno multa pericla suo.  
 Disce sequi fatum: fortunam disce vereri:  
 Sublimemq, pius disce timere Deum.*

**ERICVS VII. CHRISTOPHORI**  
*Fil. Epigr. XCVIII.*

*Septimus Imperio regali vectus Ericus,  
 Non æquæ mentis labe notatus erat.  
 Thesauro sacra templa suo nudauit: & excors  
 Matronis castis intulit omne nefas.  
 Victus ab Holsatijs dominis, vinctusq, catenis,  
 Criminis admissi præmia digna tulit.*

REGES

*Sed tamen emissus, patrias remeavit in oras:  
Tum demum cecidit seditione gravi.*

ERICVS VIII. ERICI VII. FIL.  
Epigr. XCIX.

*Ingenij cultu præstans Octauus Ericus,  
Et nitidus morum fertilitate stetit.  
Marteq; præcellens se præbuit hostibus acrem,  
Danica regna suis qui petiere minis.  
Rostochium cepit, Sundensia mœnia fregit,  
Oppidaq; euertit plurima Vandalia.  
Esse decet Regem incundum, tempore pacis:  
Esse decet durum, Marte furente gravi.*

CHRISTOPHORVS II. ERICI VIII.  
frater. Epigr. C.

*Aurea Christophorus gestauit sceptræ Secundus  
Mansueto celebris pectore donec erat.  
Redditus immanis nimium, nimiumq; seuerus,  
Eijcitur solio tristis inopsq; dato.  
Mitior effectus reuocatur ad inclyta regna:  
Senior, en mota seditione, cadit.  
Quisquis es, ô sanis memor esto affectibus vti:  
Sapè sua excelsis Regibus ira nocet.*

VALD.



## VALDMARVS III. CHRISTO.

phori II. Fil. Epigr. CI.

Valdmarus regni felix defensor auiti,  
 Libera depulso Teutone iura dedit.  
 Elandos, Fimbros, Henetosq, Gotosq, subegit:  
 Contudit & vires, Sarmata dure, tuas.  
 Amphitheatra sibi victor nitidissima struxit,  
 Tempore quæ nostro diruta penè iacent.  
 Omnia sic rigido substant mortalia fato:  
 Sola tamen Virtus inuiolata manet.

## OLAVS III. AQUINI REGIS

Noruegiae Filius, &amp; idem Valdmar III.

ex Margarita filia nepos.

Epigr. CII.

En, successit auo puer ingeniosus Olaus,  
 Cui mens in tenero pectore docta fuit:  
 Quem peperit coniux castissima Regis Aquini,  
 Filia Valdmaro Margaritis orta patre.  
 Paruus at occubuit primæ sub flore iuuentæ:  
 Spemq, nouam patriæ mors inopina tulit.  
 Sic rosa luctifico pulcerrima sternitur austro:  
 Sic pereunt dura lilia fracta manu.

F 3

MARc

REGES

MARGARITA VALDMARI III. FILIA  
Eademq̃ Olai III. mater. Epigr. CIII.

Margaris extincti carissima mater Olai,  
Plus quàm feminea prædita mente stetit.  
Legibus hæc æquis tenuit Noruegica regna:  
Sumsit & egregia Danica sceptræ manu.  
Perdomuit Sueonum Regem victricibus armis,  
Subiecitq̃ suo colla superba iugo.  
Bis tria lustra trium regnorum rexit habenas,  
Regali mulier clara potensq̃ choro.

ERICVS IX. COGNOMENTO  
Pomeranus. Epigr. CIII.

Dux bonus & prudens Pomeranæ gentis Ericus,  
Margaridis nutu Danica sceptræ tulit.  
Fimbros ac Hænetos domuit, Cimbrosq̃ rebelles:  
Vicit & Holsatios Frisiacosq̃ duces.  
Hic ætate grauis patrias remeauit in oras,  
Ocia priuatæ dulcia pacis amans.  
Sic patriæ terræ trahimur dulcedine cuncti:  
Nataliq̃ damus promptius ossa solo.

CHRISTOPHORVS III. COGNO.  
minatus Banarus. Epigr. CV.

Christophorus Banaræ clarissima gloria terræ,  
Pectore diuino suspiciendus adest.

Civis



*Ciuiles pepulit strepitus, vulgiq; furorem,  
 Vinnilijs quâ se Iutia pandit agris.  
 Tum demum reliquam vitam sine lite peregit,  
 Daniaco dicens iura colenda throno.  
 O benè felicem posito qui marte feroci,  
 Dulcia diuinæ munera pacis amat.*

## CHRISTIERNVS COGNOMENTO

Oldenburgius. Epigr. CVI.

*Qui trahit à Christi specioso germine nomen,  
 Sidere formoso clarior, ecce, nitet.  
 Aggressus vario rigidos certamine Suecos,  
 Extorsit tandem debita sceptrâ sibi.  
 Deindè rebellantes bello petiturus eosdem,  
 Plurima damna tulit, plurima damna dedit.  
 Illius auspicijs Academia Danica cepit,  
 Hafnia quâ fulget mœnibus alta suis.*

IOHANNES CHRISTIANI FIL.<sup>ER</sup>

Epigr. CVII.

*Fudit Iohannes hostes terraq; mariq;  
 Illorumq; potens debilitauit opes,  
 Edocuit Sueonũ Danorum viribus actos  
 Deposito fastu Iura, Deumq; sequi.  
 Marte Lubecanam valido compescuit iram:  
 Protexitq; pia patria regna manu.*

Ditmar

REGES

*Ditmaris autem redijt pulsatus ab oris:  
O Sors, quàm tu non semper amica venis.*

CHRISTIERNVS II. IOHAN.  
nis Fil. Epigr. CVIII.

*A Christo tenuit qui nomen grande Secundus,  
In rigidos Suecos arma corusca tulit.  
Aduersus satrapas stetit acrem pronus in iram:  
Sed miserae plebi mitior ipse fuit.  
Excidit è solio regni: mox carcere tentus  
Fortunæ fatum pertulit omne suæ.  
Quodq̃ magis laudes, instructus dogmate Christi  
Clausit in excelsa relligione diem.*

FRIDERICVS CHRISTIERNI II.  
patruus. Epigr. CIX.

*Imperium sumsit Fridericus Primus auitum,  
Qui veterum Regum stemmate natus erat.  
Hic studio Martis præponens munia pacis,  
Legibus ornauit patria Regna pijs.  
Tempore sed belli fuit ingeniosus in armis:  
Floruit & forti strenuus vsq̃ manu.  
Huius adhuc nati, Iohannes dux & Adolphus,  
Holsatiæ terræ splendida frena tenent.*

CHRI.



## CHRISTIANVS III. FRIDERICI

Fil. virtutis nomine appellatus Danorum  
Augustus. Epigr. CX.

Tertius à Christi qui duxit nomine nomen,  
Hostibus eiectis patria sceptrum tulit.  
Clara statuta dedit, decretaq; fulgida sanxit,  
Et niueum pacis condecorauit opus.  
Illius, en, cura quæ Biblia sancta vocantur  
Iam translata sua Dania voce legit.  
Nobilitate sacros ornans lauroq; Poetas,  
Augustus nostri temporis alter erat.

## FRIDERICVS II. CHRISTIANI III.

Filius. Epigr. CXI.

Tu quoq; nomen habes clarum, Friderice Secunde:  
Nec titulos tollent sæcula longa tuos.  
Ditmaricam gentem superasti fortibus armis:  
Nunc maiora tuo fulmine regna quatis.  
Templa, scholas, vrbes, arces, pelagusq; tueris:  
Doctrina & pietas te dominante vigent.  
Cum sociam vitæ Christus tibi maximus addet,  
Læticia insurget tunc mea Musa noua.

VATICINIUM DE FUTVRIS DA-  
niæ Regibus. Epigr. CXII.

G

Regia

REGES DANIAE.

Regibus hunc Danis præsto Sadolinus honorem,  
Quos decoro titulo, carmine, flore, choro.

Pauci alij surgent, ætas quia maxima lapsa:  
Id, quod ad huc superest, prebreue tempus erit.

Decrepitus mundus supremum vergit in actum:  
Mox rapidas turbas finiet vna dies.

Perpetua Christus Dominus regnabit in aula:  
Felix, ætherea quem rêget ille manu.

OPUSCULI SVI DE DANORVM  
Regibus conclusio. Epigr. CXIII.

Hæc sacra sunt Regi, quo non est æquior alter:

Hæc sacra sunt doctis, nobilibusq; viris.

Omnibus his cordi Virtus, & pulcra vetustas:

Omnibus his Vatum carmina culta placent.


Nil igitur Cynice curo fera verbera linguae:

Nil parasitorum lubrica verba moror.

Carcere mortali cum sidera, demtus, adibo:

Nomen honorabit Dania cara meum.

IEHOVÆ GENTIVM SERVA-  
tori Victoria.





## REGVM DANORVM

ILLVSTRATA PER IOHAN.

NEM Georgium Sadolinum

Vibergium.



POTENTISSIMIS Danorum Regibus illustrissima insignia applicantur, per quæ non tantum nationes, ut vulgus existimat, Imperio Danico aut sociatæ, aut subiectæ, dinumerantur: verum etiam ipsi Reges magnatesq; & clientes de Virtutibus, generoso sanguine non indignis, admonentur. De tam præclaris imaginibus, inexercitatis difficile est philosophari: nihilominus qui rerum naturam mediocri studio intuetur, hic per gratiam diuinam adiutus scopum propemodum potest attingere. De magnis itaq; rebus, breuiter dicam. Tua interim Regia Maiestas, inchyte Rex FRIDERICE, mihi faueat obsecro: nec vos nobiles & eruditi viri, animos vestros auertite, quin potius quæ à me proferentur, ea candidis mentibus perpendite, sapienterq; diiudicate, & feliciter valete.

CRUX DIVINA, candenti colore suspi- I.  
cienda, qua clypeorum Danicorum ordines incunda se-  
rie coniunguntur, monet & Regem & subditos, ut po-  
tius

G 2

# INSIGNIA

tius diuinæ protectioni, quàm humanis præsijs confi-  
dant. Teste siquidem scriptura: Nisi Dominus ædi-  
ficauerit domum, vanè laborant qui ædificant eam.  
Nisi etiam Dominus custodierit ciuitatem, frustra vi-  
gilant qui eam custodiunt. Hæc doctrina vt manife-  
stior fiat, ipsam Regis Dauidis citharam assumamus,  
ad Latinos modos per nos attemperatam.

Ni Deus ille summus

Te iuuat nutu placido, te pius & gubernet:

Quid tibi cura mordax?

Quid tuis profunt studijs anxiferi labores?

Ni Deus vrbis altos

Cælica prudens validæ muniat arte muros:

Quàm temerè laborat,

Nocte qui cæca vigilans mœnia celsa seruat.

Nil iuuat ante claræ

Lucis exortum riguo soluere te sopore:

Serus & ad quietem

Fessa tu frustra tacitam condere membra quæris:

Noxia vita demùm

Ducitur, si non Dominus te foneat, regatq̃.

Nam Deus omne præstat

Commodum iustis, & eos ditat, & ornat vltro.

Cælitus ipse donat

Filios, casti thalami pignora gratiosa:

Præ.



Præmia qui bonorum  
Sunt virum, merces simul & coniugij pudici:  
Qui velut & sagittæ  
In manu culti resident indomita parentis.  
Integer ille, tantis  
Cuius appensa est humeris plena pharetra telis.  
Victor enim refulgens  
Exeret sese: reprobos & rigidus retundet:  
Nec pudefactus vnquam  
Terga monstrabit, tumido Marte furente fastu.

Hæc Dauides, Propheta Dei, & Rex Israëlita-  
rum, diuino spiritu plenus, nobis cognoscenda propo-  
suit. Itaq; diuinæ maiestatis præsentiam ad Politias  
& Oeconomias conseruandas, prorsus necessariam esse,  
mundani Reges, & subditi omnes, iudicabunt.

TRES CORONATI LEONES, II.  
certa acie collocati, Virtutem, auctoritatem, & felicitas-  
tem Regum, in scientia rei militaris, incundissima ima-  
gine exhibent: quibus dotibus accedant comites, Inno-  
centia, temperantia, humanitas, aliaq; animi dona, quæ  
per cordium humanorum typos designantur. De qui-  
bus Principum egregijs conditionibus, variæ extant  
Poëtarum & Philosophorum conciones & illustratae  
stimonia.

G 3

LEO

INSIGNIA

III. LEO ROBUSTISSIMVS REGA-  
LI DIADEMATE PRÆCELLENS hian-  
tiq̃, rictu terribilis, bipenni etiam acutissima communi-  
tus, principis animosi in bello præclarum robur osten-  
dit: nam quemadmodum Iusticie bonitate pacis offi-  
cia sunt exercenda, sic viribus infractis belli artes sunt  
custodiendæ. Ex quo & rectè Claudianus Pœta:

Qui stabilem seruāt Augustis fratribus orbem:  
Iusticia pacem, viribus arma regunt.

IIII. LEO MANSVETIOR HVMANA  
SIBI CORDA PLACIDE SVBIECTA,  
BENIGNO INTVITV ASPICIENS, arguit  
Regum decus esse, animis hominum se decenter insinu-  
are, operamq̃ dare oportere, vt oculis etiam subdito-  
rum se prudenter commendent: omnes enim vitam gu-  
bernatorum studiosa diligentia imitantur: & si quid  
in ipsorum moribus turpe viderint, dicto citius, aut ab  
eis abalienati auertuntur, aut illorum labe infecti cor-  
rumpuntur. Adeò magna res est vt rectè indicauit  
M. CICERO, personam in Republica tueri principis.  
Cum autem Imperia, armorum rigore parta, non nisi  
honeste opinionis titulo retineantur, Regibus valdè  
vtile est ad regna sua stabilienda, Nobilium, docto-  
rum, militum, ciuium, aliorumq̃ ordinum beneuolenti-  
am, æqua recti animi moderatione sibi conciliare. Et  
certum



certum est quod ait Seneca in Octavia: Principem fide melius, quàm ferro muniri. Qui verò crudelitate potius, quàm animi mansuetudine, delectantur principes: illi rarò felicem vitæ exitum sortientur. Quis enim nescit dictum Iuuenalis?

Ad generum Cereris sine cade, & vulnere, pauci  
Descendunt Reges, & sicca morte Tyranni.

Piorum igitur subditorum officium est, ardentibus Votis à Deo opt: max: Regibus sapientiam, Virtutes, & felicitatem, exoptare, cùm constet, sine ipsius auxilio nihil rectè geri aut administrari. Nam & Plato: De legibus, apertè fatetur, ibi non esse malorum & ærumnarum effugium, ubi non Deus, sed mortalis aliquis regit: Quod dictum cum multis scripturæ diuinæ sententijs congruit: Et plurima exempla rem se sic habere, attestantur.

DRACO FAUCIBVS EXPANSIS, V.  
CAVDAQVE INTORTA TIMENDVS,  
bellicosi principis est Imago. Ille cùm, teste Plinio, veneno careat: viribus duntaxat, & arte, oportet vt se tueatur. Ad eundem modum, Reges & principes, belli honestas artes, ubi vsus postulat, sequantur: fraudes verò, & imposturas, & fœderum violationes, ac eiusmodi venena, velle imitari, non generosæ Virtutis opus censebitur, sed peruersæ Naturæ scelus detestandum

# INSIGNIA

standum nuncupabitur. Dicuntur etiam Dracones prudenti tractatione mansuescere, & hominum amicitia tandem gaudere: referunturq; exempla de Indorum Regibus, & de Tiberio Imperatore, qui istud genus, alioqui terribile, mansuetum reddiderunt: Qua cura monentur bellatores de moderatione animi exercenda, ne semper in armis voluptatem ponere conspiciantur. Poëta Græcus illud ipsum docet, ubi Regem & bonum virum esse vult, & robustum bellatorem. Versus omnibus est in ore:

Ἀμφοτέρω βασιλεὺς ἀγαθὸς κρατερός τ' αἰχμητής.

VI.

TRES REGIÆ CORONÆ vno in clypei spacio coniunctæ, Reges commonefaciunt, ut sinceri sint in Regnorum custodienda societate: nam, ut inquit Sallustius, Concordia res parvæ crescunt, discordia maximæ dilabuntur. Quàm igitur benè faciant isti, qui bonos Reges in mutuam perniciem committere non erubescant, norunt optimi principes, per bellorum lacrymabiles euentus aliquandò eruditi. Carolo V. Imperatori, scripsit Erasmus Roterodamus, Nullum bellum, neq; tam iustis de causis, neq; tam moderatè geri, quod non ingens & scelerum & calamitatum agmen secum trahat: tum maximam malorum partem ad innoxios & indignos recidere. Sapienter & rectè illud scriptum ab Erasmo asseruit Carolus, miles veteranus,

&



Et idem optimus Imperator: citauitq; ex Virgilio ver-  
sum, Nulla salus bello, pacem te poscimus omnes: signi-  
ficaturus concordiam rem vtilissimam esse mortalibus.  
De tanta igitur Virtute, Diuides noster sua Hebræa  
cithara cecinit: cuius cantum nos ad Latinam harmo-  
niam hoc modo expressimus.

O quàm suauē, quàmq; laudandum decus,  
Pectora siderea fouerier concordia.

Tam gratiosus hic honor fertur pijs,  
Quàm solet esse liquor blandè fluentis balsami,  
Per verticem, per & comam, per & togam  
Pontificis, nitidum qui fidus ante stat Deum.

Sic & virescens Hermon, & potens Sion,  
Rore nouo madidi fragrant, abundant, enitēt.  
Nam quos fidelis ardor, & fraternitas

Intemerata trahit, morumq; casta suauitas:  
His inserit se, per suum Verbum, Deus:

Hosq; sibi sociat virtute sacri flaminis.

Itaque qui tantorum bonorum particeps esse con-  
cupiscat, dissidia detestabitur, mutuamq; cum bonis  
amiciciam alere elaborabit.

CANDIDVS ET IMMACVLATVS VII.  
AGNVS, LÆTVM VICTORIÆ SIGNVM  
HVMERIS ATTOLLENS, Triumphatoris  
H Christi

# INSIGNIA

Christi memorabilis est Imago. Hic in ara crucis  
 Victima factus, abstulit à nobis peccati reatum, iram  
 Dei, æternam maledictionem: unde & optimè in  
 ipsum quadrat confessio Iohannis Baptiste, dicentis:  
 Ecce agnus DEI, qui tollit peccatum mundi. Idem,  
 per gloriosam suam resurrectionem, reddidit nobis In-  
 sticiam, gratiam & salutis hæreditatem. De qua Mes-  
 sie Victoria extat oda Davidis, à nobis decantata.

Omnes ô populi Deum sonate,  
 Et plausu decorate glorioso.  
 Hic celsus Dominus, tremendus, ingens,  
 Terram numine concutit corusco.  
 Hic gentes, variasq; nationes,  
 Nostris sub pedibus facit iacere.  
 Hic nos constituit sibi ministros,  
 Hæredesq; suæ vocavit aulæ.  
 Hic nos Isacidis domo creatos,  
 Fecit magnifica vigere laude.  
 Hic ascendit ad arduum sedile  
 Cum cantu, sonituq; buccinarum.  
 Regem psallite voce, & ore, clarum.  
 Clarum psallite voce, & ore, Regem.  
 Regem concelebrate gratiosum,  
 Quicumq; ingenio bono valetis.

Terram



Terram omnem Dominus Deus tuetur,  
 Qui cœli solio sacro quiescit.  
 Hunc iustus Tharides Deum putauit:  
 Hunc gentes placido fauore adorant.  
 Reges hic superat Deus potentes  
 Maiestate sua, altior refulgens.  
 Cunctos hic procures, Duces & orbis  
 Omnes, æthereo nitore vincit.

De huius etiam agni Virtute & potentia, operæ  
 est precium legere dulcissimum librum Beati Iohannis  
 Theologi, quem Apocalypsin appellauit, propterea quod  
 in eo suauissimæ reuelationes comprehenduntur. Cete-  
 rum pulcherrimus hic Agni typus, ideo inter Regum  
 Danorum insignia ostenditur, ut ipsi cogitent curam  
 doctrinæ Christianæ ad se pertinere. Qui enim Vr-  
 bes, arces, naues, curiosè ædificat, nec scholas, Acade-  
 mias, Ecclesias, reuerenter exornat, hic Regis officium  
 imperfectè quodammodo videtur administrare. Hanc  
 ob causam & potentissimus olim Danorum Rex,  
 Diuus Christianus III. Friderici II. pater depositis  
 armis: Canonicorum, Monachorum, & sacrificulorum  
 nugas & deliramenta, è domo Domini profligauit.  
 Christianasq; in Ecclesiam Cereemonias intulit: qua in  
 re vsus est consilio & autoritate magnorum virorum,  
 quorum nomina descripta in Ordinatione Ecclesiarum

H 2

nostra

nostrarum eniteſcunt. Quin & Moſis, Prophetarum,  
& Apoſtolorum libros quos Biblia vocamus, cum om-  
nibus ſuis partibus, in Danicam noſtram linguam, per  
ſapientiſſimos Viros, Theologiæ Doctores. D. Pe-  
trum Palladium, & D. Nicolaum Hemmingium, &  
alios, è peregrino idiomate transferri curavit: nec ali-  
quid iuxta Regij ſui officiij rationem, aut ſi mauis, dig-  
nitatem, intentatum reliquit amantiſſimus ille patriæ  
pater, quod ad gloriam Dei illuſtrandam cognouit per-  
tinere. Illud demùm eſt Agnum Triumphatorem  
in clypeo ſuo geſtare: quod fortè alijs ridiculum vide-  
tur, quibus crudelia monſtra, in clypeis ſuis, videntur  
magis nobilia: ſicut & ſcripſimus quandoq; ad cla-  
riſſimum Virum, D. Iohannem Fräciſcum Ripenſem:  
Medicinæ Doctorem, & eundem Poëtam excellentem:  
nam & nos aureum agnum, qui genibus candicanti li-  
bro, in clypeo cæruleo, innititur, geſtamus: Verſus au-  
tem noſtri hunc in modum recitantur.

Hi barros, & apros, & pardos, & crocodilos,  
Et quæ terra fouet monſtra cruenta, tenent.  
Illi Syrenas, delphinos, atq; balenas,  
Et quicquid Triton cernit amatq;, ferunt.  
Nonnulli coruos, miluos, niſosq; feroces,  
Quicquid & in liquidis nubibus errat, habent:  
Non



Non ea signa traho Vates, cui Musa perennis  
 Candida Castalijs pectora rorat aquis.  
 Qui nineum genibus librum premit aureus agnus,  
 Cæruleo in clypeo fulget imago mihi.  
 Quæ mea, Iohannes Francisce, insignia cernens,  
 Lene tuo socio pectus inesse puta.

Sed Regio agno Victoriæ signum dignè attribui-  
 tur: Rex enim sua Maiestate nobis est eminentior.  
 Agno Sadolinaeo liber honestè supponitur, cùm ex arti-  
 bus liberalibus nobis fama comparetur. Si tamen  
 nostro clypeo illustrissimus Rex D. Fridericus II. ga-  
 leam Laureatam imponere quandoq. volet, quid eos  
 morabimur qui nos superbiores fore clamitabunt? Sed  
 extra iocum. Agno nihil est mansuetius: nec generoso  
 Regis animo aliquid, post Deum, clementius: Musis  
 etiam candidis quid amabilius? Desinant iccirco im-  
 probi, aut Iouialem, aut Phæbæum agnum, obliquè  
 denotare.

GEMINI LEONES in campi planicie  
 minabundi, tutelam terræ videntur designare: Nam  
 sicut hi animantium Reges robustissimi, lupos & alias  
 noxias feras, aut in fugam agunt, aut dilacerant: ita  
 principum Virtus est, eorum compescere crudelitatem,  
 qui sua voracitate, & immanitate grassantes, miserrime

VIII.

H 3

mo sub

# INSIGNIA

mo subditorum sanguine saginari letantur. Vbi enim potentiorum dominatur improba & scelerata libido, ibi salus inferiorum prorsus est deplorata. Quamquam autem multi egregij, nobiles, & magnanimi Viri, mira benevolentia pauperem & afflictam plebem complectantur: multi tamen sua libertate ad aliorum oppressionem nefarie abutuntur. Tales voraces lupi à generosis Leonibus sunt in ordinem redigendi. Nam quid sanctius, quam ut boni principes sint custodes pacis, & defendant corpora & facultates subditorum suorum, contra eos qui iniusta violentia, & latrocinijs, Legem pariter & gregem, delere constituunt. Etenim sub bonis Regibus incolæ Regni, ritè nutriuntur, & legitimè defenduntur. Ex quo, & princeps apud Danielelem depingitur tanquam pulcerrima & fecundissima arbor, quæ ramorum umbraculo protegit animalia campi, & eadem fructibus suis pascit & sustentat. Cum autem ab omnibus bonis nobilibus in Daniæ Regno egregius ille liber, De officio Magistratuum ex varijs diuinorū voluminū locis concinnatus à clarissimo Viro, concionatore Regio, D. M. Nicolao Coldingio, cui cognomentū à Victoria rectè tribuitur: & aliorum quoque Doctorum scripta de eadem materia, non sint incognita Virtutum studiosis: plura exempla, quæ ad hunc



hunc scopum faciunt, quilibet propria industria inuestigabit.

**PISCIS CORONATVS,** Imperium IX.  
 aequoris insinuat, vnde indigenae, & vicini populi, & hospites boni, piscatura felici, per gratiam diuinam, euadunt abundantiores. Piratae igitur & nebulones, qui tanta subditorum commoda impedire conabuntur, à bonis Regibus debent coërceri. Neptunum veteres maris Dominum constituerunt, designaturi hoc etiam regnum, non sine diuino subsidio possideri. Hinc dignitas Nauarcharum dimanauit, quos Admeraldos Dani pariter, & Germani, & non nullae aliae gentes, vocare consueuerunt. Et Saxo Grammaticus autor est, Helgonem Daniae Regem diuiso, cum fratre, regno, maris possessionem sortitum fuisse: & aliquot etiam naualia praelia, maritimis copijs instructum, gessisse: Regniq. decus hoc praeclarissimo studio pulcerrimè adauxisse. Quod exemplum etiam nunc nostri Nauarchae auspicio illustrissimi Regis, Friderici II. imitantur. Quapropter & piscis coronatus inter insignia Regum Danorum meritò dinumeratur.

**TRIA VRTICAE FOLIA, TOTI X.**  
**DEM INTERIECTIS CLAVIS DI-**  
**VISA,** principes ipsos monent, vt prauos cordis  
 affe

# INSIGNIA

affectus, & vrentes pectoris flammæ, per sapientis animæ liberas potentias, cohibeant. Maius quippè & nobilius opus est, sese vincere, quàm alios debellare, sicut inquit Horatius:

Latiùs regnes auidum domando  
Spiritus, quàm si Lybiam remotis  
Gadibus iungas, & vterq; Pænus  
Seruiat vni.

Nec fortè à scopo aberrauerit, qui Vrticæ folia clauis suffixa, obrectatorum & calumniatorum reprehensionem significare contenderit: Regum siquidem officium est, suo studio & industria, eos refellere & castigare, qui honestos bonorum labores petulanter conuellere conantur. Vnde eleganter Georgius Sabinus, Poëtam quendam improbum & mordacem, non Lauro, sed vrtica, à Cæsare coronandum existimauit. Sic & adulatores & obrectatores, quia æquè suis venenis nocent, nō aureis catenis, sed ferreis vinculis dignos, aliquis alius pronunciaret: de quibus extat vtilissima commonefactio in historia Iohannis Regis, quæ potentissimo & sapientissimo Regi nostro, D. FRIDERICO II. ab autore est dedicata.

XI. CYGNVS CANDORE NOTABILIS,  
REGIOQUE DIADEMATE  
CIRCA



CIRCA COLLVM INCINCTVS *Symbolum est Poëtarum, sicut in Emblemat: Andreas Alciatus monet: qui cum carminibus suis Viros principes ornârint, posteritatiq; commendârint, ab eis vicissim desiderant amari & honorari. Reges enim antiqui, sapientes & boni, non modò eos, qui strenuam in bello operam nauârunt, sicuti quidam aulici existimant, sed etiam qui ingenio excellenti illustres, res principum & nationum scriptis ornârunt, lauro & auro, & honore Equestri dignos indicârunt. Nam ut alij motus heroici, quibus virtutes excellentes exu- scitantur, sunt singularia dona Dei in Natura principum: ita vis ingenij præclara ad eruditè scribendum, Dei mirandum est opus, & pulcerrimum Naturæ humanæ ornamentum. Quod ut Regibus Daniae notum esse consideremus, olorem diademate ornatum inter insignia sua solent gestare, de quo tale aliquandò Epigramma in lucem edidimus.*

*Eximium decorant Regem sacra carmina Vatum:*

*Vatibus Aonijs Rex bonus ipse fauet.*

*Nomina dant Vates: laurum Rex donat, & aurũ.*

*Sic Rex, sic Vates munera digna ferunt.*

*Edocet hoc nitido vinctus diademate Cygnus,*

*Danorum Regi qui benè iunctus adest.*

*Cum verò honoribus artes alantur, eademq; si sper-*  
I
nantur,

# INSIGNIA

nantur, elanguescant : quibus deletis reuerti solet Bar-  
 baries offuscans nomina Regum, & magnorum Viro-  
 rum : decet vt qui clari esse voluerint; & à posteritate  
 etiam laudari exoptauerint, hi pietati & Virtuti ope-  
 ram dent, virosq; doctos & sapientes, Musarumq; can-  
 tibus præcellentes, beneficentia & munificentia prose-  
 quantur. Nec vlla est via facilius perueniendi ad fa-  
 mæ eternitatem, quàm si eruditione illustres homines  
 tibi studeas conciliare. Itaq; Scipio in medijs belli ap-  
 paratibus, teste Pontano, bonarum artium studia non  
 prætermittebat : & partis Victorijs cum eruditis fre-  
 quenter versabatur. Iulius Cæsar liberalium artium  
 professores, vt scribit Suetonius, ciuitate donabat, vt  
 libentiùs Urbem incolerent. His accedunt Imperato-  
 res, Vespasianus, Adrianus, Carolus Magnus, Carolus  
 Crassus, Sigismundus, Carolus V. & alij doctorum  
 hominum amantiſſimi principes, Et Diuus Christia-  
 nus III. literarum tanto amore flagrabat, vt pluris fe-  
 cerit librorum, quàm auri sibi thesaurum comparare :  
 quod ipsum de Gordiano Imperatore, etiam referunt.  
 Et ne viris solùm hanc Virtutē propriam esse putes, de  
 Domina ELISABETHA Regina Angliæ, HEN-  
 RICHI VIII. filia ex Domina ANNA BOLONIA  
 Regina, à fide dignissimis cognouimus, eam vt lingua-  
 rum literarumq; peritissimam, ita ab ea doctissimos ho-  
 mines



mines plurimum honorari. Quod ornamentum gratu-  
lor florentissimo Anglorum Regno: oroq; Deum, vt in  
ea quoq; gente Euangelij doctrinam, & humanitatis  
studia, sinat propagari. Nam alioqui nimis multi sunt  
populi, quibus odio sunt artes bonæ, parumq; curant  
Cygnos Regio diademate ornatos, intueri. Sed qui sapi-  
entiores existunt, donis DEI grati fruuntur, &  
famam suam studio eruditorum inclarescere lætantur.  
Quid? quod & à Cygnis exemplum capiunt non modò  
viuendi, sed & suauiter moriendi: quia et ipsi Cygni ca-  
stissimè viuunt: ac esu pariter, & mirando vsu vrticæ,  
Venereas libidines extenuant: & imminente morte, dul-  
cissimo murmure læticiam suā testantur, Nec impedit  
quòd C. Plinius in Naturali historia, illud quod de fle-  
bili Olorum, sub vitæ finē, cantu referatur, falsum, ali-  
quot experimentis, arbitretur: cū ipsius dubitatio non  
euertat multitudinis sententiam contraria experimenta  
afferentis. De Cygnæa cantione, Poëtæ plurima pro-  
diderunt, quia avis sacra est Apolloni & Veneri, nec  
opus est causas recensere.

BINÆ TRABES æqua proportionē ad XII.  
suas metas deductæ, Legum diuinarum & humana-  
rum æquitatem rectitudinemq; denotant. Magis tamen  
necessaria est in Regno pulcerrima legum harmonia,  
quàm in domo legitima trabium contignatio. Danda

est igitur opera Regibus, ut & ipsi rectè iudicent, & cognoscendis causis, viros mente integros, & iudicio incorruptos, præficient. Etenim dici non potest quàm varijs modis oppugnetur Iusticia, cùm inter veras legum metas impetuosus Iudicum furor sese nesciat cohibere. Multi etiam, muneribus corrupti, bonas leges proterunt, & iniquas sententias pronunciant. Neque enim sine causa dictum est à Petronio Poëta.

*Quid faciant leges, ubi sola pecunia regnat?*

*Aut ubi paupertas vincere nulla potest?*

Verùm contra tales Iusticiæ violatores extat diuina comminatio: *Vae illis qui scribunt decreta iniqua, & qui iubent cumulare miseriam: qui scilicet, arcunt pauperes à iudicio, & violant causas afflictorum, viudas dispoliant, & pupillos deprædantur.* Ceterùm pii principes iniusticiam detestantur, sapienterque omnes suas actiones instituunt, ut Deo pariter sint honori, & hominibus vtilitati. Porro de legum reuerentia, quæ vel ex natura hominis, vel ex vniuerso, vel ex ipso Deo desumuntur, multi docuerunt. Et qui artem Iuris in regno nostro, nostra hac tempestate, tradunt: qualis est D. Albertus Cnopperus I. V. Doctor, & alij viri excellentes: earundem vsum disertè demonstrant. Quorum consiliū qui sequuntur, Danicas nostras Leges, quæ Valdmáro Regi ascribuntur, optimè intelligunt: cūm



cū alijs, qui fontes æquitatis negligunt, rabulæ & caussidici, inanem duntaxat scientiam, ne dicam perniciosam præsumtionem, videntur ostentare. Sed hoc malum in imperitis præfectis, à nobis nequaquàm potest emendari. Reges hoc facere possunt, quibus autoritas est malos & ingnavos remouendi, bonosq; & prudentes constituendi: & vt hoc æquitatis officium præstent, pulcerrimæ trabes, iusta mensura ad legitimas suas metas protractæ, insinuant.

## CRVCIS DOMINICÆ SIGNACVLVM XIII.

monet, Regum pietatem esse Dei filio se submittere, & contra hostes potius Ecclesiæ Christianæ strenuè dimicare, quàm Fidei rectæ assertores iniustis armis molestare. Atq; vtinam in Turcos, Saracenos, Ethnicos, monstrum Babilonicum, conspirarent boni principes, nec se inuicem mutua laniena conficerent. Neq; tamen legitimum bellum reprehendimus, quod suscipit magistratus aduersus hostes contumaces, qui alioqui nulla pietate, nullo honesto fœdere, volunt detineri. Talis enim castigatio, malorumq; repressio, iure Naturæ & diuino conceditur: nec exempla heroica fortium Virorum refragantur. Et placet mihi studium Saxonis Grammatici, qui cū historiam gentis nostræ elegantissimè condiderit, grauissimas orationes, quibus veteres Dani se mutuò ad bellicam virtutem excitârint,

etiam descripserit. Versus quoque ipsius plurimum roboris habent. Quid enim magis militare?

Quisquis amiciciam Regis colit, arma capeſcat:  
 Pensandis animis belli promptiſſima laus eſt.  
 Ergo Viris timidum nihil, aut leue, fortibus inſit.  
 Deſtituatque animos armis ceſſura Voluptas.  
 In precio iam fama manet: laudis ſibi quiſque  
 Arbitrari eſſe poteſt, propriaque niteſcere dextra.  
 Inſtructum luxu nihil aſſit: plena rigoris  
 Omnia præſentem diſcant euoluere cladem,  
 Non debet laudis titulos, aut præmia captans  
 Ignauo torpere metu: ſed fortibus ire  
 Obuius & gelidum non expalleſcere ferrum.  
 Et paulò poſt idem autor, hæc ad hunc modum ſubijcit:  
 Arripiat digitis pugnacibus arma ſatelles  
 Inijciens dextram capulo, clypeumque retentans.  
 Inque hoſtes ruat, & nullos expalleat ictus.  
 Nemo ſe retro, feriendum præbeat hoſti:  
 Nemo enſes tergo excipiat. pugnatia ſemper  
 Pectora vulneribus pateant. certamina prima  
 Fronte gerunt aquilæ: & rapidis ſerictibus vrgent  
 Anteriore loco. ſpecies vos alitis æquet  
 Aduerſo nullam metuentis corpore plagam.  
 His & alijs egregijs exhortationibus, adeò incitati ſunt ad Virtutem veteres Dani, vt pro Rege ſuo, &  
 pro



pro Dania communi patria, mortem fortiter oppetere non dubitarent. Quorum exemplum imitari debent posterī, qui dedecus & infamiam volunt effugere. Turpissima siquidem res est militibus, Regem & ducem suum tempore belli deserere: matres, coniuges, virgines, filias, hosti contaminandas, ac trucidandas, relinquere: Tempia, scholas, vrbes, oppida, pagos, fundos, & familiam, inimicorum crudelitati exponere: quæ omnia tum demum custodientur, cum fidem Regi & duci tuo, datam, inuiolabili pacto seruabis, aduersarijsq; crudelibus te heroico animi impetu oppones: nec te à sacrosancto diuinæ crucis signaculo, hoc est, à Christi Domini consortio, alienum exhibebis. De hac igitur Virtute, crucis Dominicæ signaculum, inter insignia Regum Danorum depictum, nos commonefacit.

MILES CATAPHRACTVS, Caballo gen. XIII.  
 nerofo se decenter attollens, & idem strictum ensem, quasi cuncta obstacula valido ictu dissecuturus, ostentans: Virtutes Regias, quas M. T. Cicero Imperatorias appellat, videlicet laborē in negotijs, fortitudinem in periculis, industriam in agendo, celeritatem in conficiendo, pulchra imagine patefacit. Non enim decet Regem esse Sardanapalum, hoc est, mollem & effæminatum: sed Equitem cataphractum, id est, qui fortitudine animi generosus, & robore corporis excellens, ac ar-  
 tibus

INSIGNIA

tibus bellicis conspicuus, subditos suos ab hostili insultu  
norit defendere. Quæ Virtutes in multis Regibus ap-  
paruerunt: & hoc quoq; nostro tempore in D. FRI-  
DERICO II. Rege enitescunt: qui cum aliquot vi-  
ctorijs sit prius condecoratus, & ad huc auxilium à  
Deo, REGE OPT. MAX. speret: quid obstat quo-  
minus hanc Davidis odam, ad harmonias testudineas  
à nobis traductam, pro Regia ipsius Maiestate, idq;  
cum Ecclesia Dei, concinamus.

Sollicitæ quando tuæ cingent pectora curæ,

Ac dura fors cum te premet:

Aure tuam vocem facili Deus hauriat, oro:

Et te sua tegat manu.

Numine qui celsò regit astra, solumq; fretumq;

Opem tibi ferat suam:

IIIIX. Præsidiumq; lubens præstet de monte Sione,

Promatq; digna munera.

Suscipiat promptus tua dona: nec improbet abs te

Aris locatam victimam.

Det tibi quod gratū est: tribuat quodcūq; requiris:

Et cepta fortunet tua.

Te florente statu recto gaudebimus omnes:

Deoq; agemus gratias.

Irrita non fient tua candida vota, nec unquam

Vanæ preces erunt tuæ.

Mens



Mens etenim manifesta Dei: nam blandus adesse

Hic Regibus solet pijs.

Aures hic adhibet clamantibus: hicq; rogantes

Sua iuuat potentia.

Curribus insurgunt isti, rapidisq; caballis:

Nos nitimur summo Deo.

In Barathrum uastum feruens furor incitat ipsos:

En, Rege nos stamus Deo.

Ergo Deus, nostrum deinceps defendito Regem:

Eiusq; conatum iuuat.

Rex verò adiutus, Dominum veneretur olympi:

Et subditos curet suos.

Neq; molestum erit Epinicion illud addere: quod ex eodem Dauide Rege desumptum, ad nostros numeros, in honorem Dei applicuimus XIII. Cal. Nouemb. Anni Dn. M. D. L XV. pro illustri illa victoria, quam eodem die eiusdem anni, Rex noster FRIDERICVS II. in Hallandia ad Falchenburgum, contra Suecos obtinuit. Cuius pugnae historiam clarissimus Vir C. Erasmus Michaëlius Lætus, Theologiae Doctor, & Poëta nobilis, patria lingua artificiosè composuit. Cæterum nostra ex Dauide cantio, quam & deinceps, in simili Fortunaë euentu, posterì nostri ad Deum sonabunt, hac ratione inter alios Psalmos, à nobis expositos, decantatur.

K

Rex

Rex tuo leuatus,  
 O Deus, fauore,  
 Gaudium capeſcet,  
 Teq; personabit.  
 Concupita cordis  
 Cuncta ei dedisti:  
 Vlla res nec illi eſt  
 Denegata per te.  
 Spontè largiendo,  
 Tu bonus niteſcis:  
 Te volente, Rex fert  
 Auream coronam.  
 Si dies requirat  
 Pauculos per annos  
 Protrahi: iubebis  
 Vuat vſq; & vſq;  
 Te ſuum fatetur  
 Principem, ducemq;  
 Hunc viciffim adornas  
 Laude ſempiterna.  
 Hunc tuum miniſtrum  
 Tu, Deus, tueris:  
 Gaudio ac eundem  
 Afficis perenni.

Spe



*Spe sua recumbens  
Rex, Deo acquiescit:  
Firmiterq; surgens,  
Stat Dei fauore.*

*At manus tua hostes,  
O Deus, retundet,  
Qui fugare tentant  
Te tutumq; Regem.*

*Hos, velut caminum  
Ignem, excitabis  
Per tui rigoris  
Feruidum furorem.*

*Caelitus resultans  
Ira aduret ipsos,  
Flamma ceu receptas  
Deuorans aristas.*

*Terra eis proterua  
Commodum negabit:  
Cumq; eis maligni  
Filij peribunt.*

*Nam nimis rebelles  
Corde, & ore, agebant:  
Quid tamen valebant  
Cogitata praua?*

K 2

Ergo

# INSIGNIA

Ergò eos beatis

Sedibus repelle:

Inq̃ eos sagittas

Tortiles reflecte.

O Deus, potenter

Grande robur vrge:

Sic decus frequenter

Nos tuum canemus.

Supereſt vt de *AVREA CORONA*, clypeis Re-  
gum Danorum ſuperimpoſita, nunc dicamus. Hæc  
cũ puriſſimo metallo ſit artiſcioſiſſimè fabricata: ſi-  
gnificat Regiam Maieſtatē tanta animæ puritate præ-  
ditam eſſe debere, vt, depoſito faſtu, ſe Deo Deiꝝ gna-  
to dedat: Eccleſiæ congregatione gaudeat: bonos re &  
conſilio adiuvet: malos autoritate ſua coërceat: æquita-  
tem approbet: Iniquitatem repudiat: Leges rectas con-  
ſtituat: Auariciam, iudiciũ mentis obcæcantē, deteſte-  
tur. Quas Regias Virtutes nobile illud Daniæ noſtræ  
lumen, D. Nicolaus Hemmingius Lolandius, Theolo-  
giæ Doct̃or, triumꝫ linguarum profeſſor, vetus meus  
præceptor, in pulcerrima quadam Epistoſta ad DI-  
VVM CHRISTIANVM III. diſer-  
tè & luculenter expoſuit. Nos memoriæ cauſſa,  
eaſdem hoc carmine perſtrinximus, quod extat in Fa-  
ſciculo noſtro Apollinari.

Regem



Regem quæ faciunt beatiorem,  
 Hæc tu noueris esse, Rex benigne:  
 Christum pectore & ore confiteri:  
 Lætâ mente domum Dei videre:  
 Verbis ac opibus bonos iuuare:  
 Et frenis cohibere contumaces:  
 Quod iustum est, sapienter approbare:  
 Iniustum fugere in Dei timore:  
 Aquis Legibus adiuuare Regnum:  
 Lucrum spernere, ceu malum venenum.  
 Regem quæ faciunt beatiorem  
 Hæc tu noueris esse, Rex benigne.

His igitur Virtutibus, quicumq; Rex enituerit, ille purissimo auro conflata coronam meritò tætur: quem admodum & facit Rex noster clementissimus, D. FREDERICVS II. Id quod citra adulationem à me dici, vellem vt Viri candidi, & integri cognoscerent. Etenim si adulatoriam artem (à qua semper abhorruì) sectari, in animum induxissem: non in Lolandia, exiguo rure Flintingio & prædijs Torouillanis contentus, gratissimum ocium Musis meis tribuere attentassem, nec me in terram spacio quidem angustam, sed campis, syluis, & fontibus amœnam, detulissem: quin potiùs phaleratis nugis, & fabulosis vanitatibus turgidus, in aulas Imperatorum & principum properassem. Sed ma-

K 3

lui

# INSIGNIA

lui sub bono Rege tenuem libertatem, tanquàm letam  
 possèssiunculam, prudenter tueri: Deoq; & Ecclesie  
 piè insèruire: tùm & ea, quæ honori essent Regi, patriæ  
 & amicis, studiosè meditari: quod animi mei proposi-  
 tum, ne deinceps vlla Fortunæ malicia impediât, effi-  
 ciat oro Dei filius, qui me à puero, in hunc vsq; di-  
 em, benignè gubernauit. Sed ad auream coronam, quæ  
 clypeis Regum nostrorum superaddita est, reuertamur.  
 Hæc cum iustas gemmarum collocationes incundissimo  
 nexu contineat, Reges ipsos monet, vt bonos hominum  
 cœtus, qui in Regno sunt, caritate & beneuolentia com-  
 plectantur. Rex siquidem populi corona est: gemmæ,  
 varij hominum ordines, quorum singuli Regem suum,  
 iuxta suas à Deo & natura sibi concessas dotes, exor-  
 nabunt. Verùm singulis gemmis propria sua est vis,  
 suumq; peculiare decus: sic sapphyrus, adamas, smarag-  
 dus, iaspis & alij nobilissimi lapides, colore, viribus, &  
 honore, differunt: omnes tamen suo modo coronam, cui  
 insèruntur exornant. Non aliter hominum multiplices  
 in Regno distributiones, & societates, Regem suum,  
 cuius Imperio protegentur, debent honorare. Et cum  
 varijs dotibus homines sint ornati, diuersis quoq; modis  
 Regi suo prodesse tenentur. Qui sapientia valent, consi-  
 lio: qui diuitijs, facultate: qui viribus, robore: qui li-  
 teris, ingenio: qui artificijs, arte: qui verò cælestium  
 donorum



donorum infusione, precibus pijs & ardentibus votis ipsum adiunabunt. Ita vtilis erunt. Senatores, Nobiles, Milites, eruditi, Mechanici & alij homines, Deo & honestati dediti & consecrati: qui omnes venerando pulcerrimarum gemmarum titulo comprehenduntur. Iam quilibet cogitet, ut suis dotibus rectè utatur, ne potius inutilis massa, quàm preciosa gemma dici mereatur. Videantq; Reges venturi, ut homines bonos & vtilis, non secus ac præcellentes gemmas & vniones ament, eosq; gratia & studio benignè, comiter, & liberaliter prosequantur. Id enim monet aurea corona tanto artificio decorata, quæ clypeis Regum Danorum superimposita, decenti gemmarum nitore resplendescit. Non aliter sibi constant hæc sacra. Qui, nationes Imperio Danico vel sociatas, vel subiectas, quæ nobiscum his insignibus vtuntur, cognoscere volet: ille historias legat, aut solummodo eos interroget, qui harum rerum peritiam se habere gloriantur: me siquidem in illas admonitiones dilabi, ratio instituta non permittit.

Hanc igitur in Regum Danorum Insignia Exegesis, simpliciter Virtutis amore, deliniaui: non eò quòd mea somnia optima putàrim, aut alios meliora inuenta afferre non posse existimàrim, cum multi sint in florentissimo Dania Regno, viri ingenio, iudicio & industria, me longè excellentiores: sed ut hoc studio quali-

INSIGNIA REGVM DANIAE.

cunq. amicis quibusdam bonis, & nobilibus, quos intel-  
lexeram maiestate & titulis Regum nostrorum letari,  
Fortunaq. gentis Danicæ gloriosa demulceri, ac Vir-  
tutum quoq. desiderio detineri, gratificarer. Proinde  
ea sectatus sum, quæ cum re ipsa cognoui congruere,  
quanquam multa, quæ annotari possent præterij, &  
quidem spontè, ne opus immensum nasceretur. Est ergò  
& alijs relictus locus & dicendi & scribendi, qui ma-  
gis conuenientia in posterum erunt edocturi. Filium  
Dei, Dominum nostrum Iesum Christum, ex intimo  
cordis affectu, oro, vt Ecclesiam suam in his Regnis col-  
ligat: in agnitione nominis sui retineat: Regem no-  
strum atq. Regni Senatum, & militares ordines, tum  
& literatorum frequentiam, gregemq. ciuilem, nec non  
plebeiorum agmina, defendat: Angelos verò suos san-  
ctos iusta acie collocet, qui hostiles dolos, & omnia pe-  
ricula corporum & animarum, à nobis, & ab omnibus  
pijs auertāt: Cui cum Patre, & cum Spiritu san-

cto, vni, soli, æterno, misericordi Deo,

sit honor, potentia & victoria

in sæcula sempiterna,

AMEN.

F I N I S.





H A F N I Æ,  
Excudebat Laurentius  
Benedictus.

1 5 6 9.

*CVM GRATIA ET PRIVILE.*  
*gio Regiæ Maiestatis.*



AD LECTOREM.

Quæ inter excudendum errata irrepserunt, ea hunc  
in modum, candide lector, veniunt  
emendanda.

In Choro Regum.

In titulo Epigrammatis 17. idemq; è sorore, lege  
idemq; Frotonis è sorore. Epigr: 57. versu 3. pro pul-  
satur, legendum pulsator. Epigr: 117. versu 4. pro pre-  
breue, legendum perbreue.

In Insignibus Regum.

Fol. 31. fac. 2. lineis 18. & 19. post hæc verba in  
Daniæ Regno, scribendum legatur. Fol. 32. fac. 1. lin.  
16. pro gessisse, legendum fecisse. Fol. 40. fac. 2. line-  
is 11. & 12. post colligat loco distinctionis legendum,  
eandemq;.

Hæc ex autographo Vibergiano Correcta,  
consulas boni, candide lector.

Nam Sapientes.

Gnari suarum virium,  
Communes hominum ferunt dolores.



